



संपादक
गणेश खुगशाल 'गणी'

सदेई

हे अँचि डांड्योँ तुम नीसि जावा,
घणी कुळायोँ तुम छाँटि होवा।
मै कू लगीं छ खुद मैतुड़ा की,
बाबा जि को देखण देश देवा।
मैत ऽ कि मेरी तु त पौन प्यारि,
सुणौ तु रैबार त मां को मेरी।
गाडू गदऽन्यू व हिलांस कप्फू,
मैतऽ को मेरा तुम गीत गावा।



तारादत्त गैरोला



धाद

साहित्य अर संस्कृति की मासिक पत्रिका

• वर्ष : 2 • अंक : 8 • मार्च, 2017 RNI No. UTTGAR/2015/63986 • मोल ₹ : 20/-

संकल्पना : लोकेश नवानी
संस्थापक सम्पादक : सुशीला बडोला
सम्पादक : गणेश खुगशाल 'गणी'
संसाधन : विनोद घनशाला, जगदीश बडोला
जगदीश नेगी
अन्वार : राकेश 'राका'
आकल्पन : चन्द्रविजय अरोड़ा, अशोक बलोदी
भितरा रेखांकन : लता शुक्ला
कार्टून : आशीष कुमार
सम्पादकीय कार्यालय : धाद
126, विकास मार्ग पौड़ी-246 001
दूरभाष : +91-9412079537
ई-मेल : dhad.garhwali@gmail.com
एक सालै सदस्यता : 220/- रुपया
दिल्ली सम्पर्क : ए-162/UG-4, दिलशाद कॉलोनी,
दिल्ली-110 095
सम्पर्क : 09013285624

पत्रिका मा छप्यां विचार लिखारू का अपणा विचार छन,
यां खुणै सम्पादक मंडल को राजि होण जरूरी नी छ।

स्वत्वाधिकारी, प्रकाशक, मुद्रक गणेश खुगशाल 'गणी' द्वारा
प्रगति प्रिंटिंग प्रेस, एजेंसी चौक पौड़ी,
पौड़ी गढ़वाल से मुद्रित कराकर 'धाद' कार्यालय : 126
विकास मार्ग पौड़ी-246 001 से प्रकाशित.
संपादक : गणेश खुगशाल 'गणी'

चैत अर चैती

गढ़वाळ मा चैत अर चैती की अपणि सांस्कृतिक परम्परा छ यानै चैत तैं 'नाचदो मैना' वि बोल्ये जांद, चैत मै बसन्त को उलार वि अपणा सुमार पर रौंद मतलब मनखि हि ना बल्कन भौरा प्वतळों को बि यो नाचदो मैना होंद। सांस्कृतिक रूप से यो नाचदो मैना हमारि अपणि धरति का लोक कलाकारों की वजै से बि होंद जब औजि अपणां ढोल दमौ कि गमक अर रंगत का दगड़ि 'चैती पसारा' मांगदन अर दिसा धियाणि भ्यंटेणो तौका सैसुर तक पौँछदन।

अपणा लोक की संस्कृति को यो सांस्कृतिक स्वरूप आज बि छँछ पर अब यि परम्परा कखि कखि ही रयीं छन, चैती पसारा मंगद लोक का यि कलाकार लोक कि प्रचलित गाथों तैं गौंदन जन राजा हरिशचन्द्र, गंगू रमोला, चन्द्रावलि, जसी पंयूळि, अर सरू कि गाथा का दगड़ा दगड़ि सदेई। चैती गायन की परम्परा का यों गीतु की शुरुआत मंगलाचरण से होंद अर यि गीत जब अगैन बढ़दन त यों मा बसन्त की अन्वार, गैख कि जैबिरधि कुल विरधि, दिसा धियाणि कि खौरि, मैतै याद, जना प्रसंग शामिल होदन अर दगड़ै दान की महिमा को वर्णन होणों रौंद। चैत की यूं परम्परों की वजै से अर यि सब मैत अर सौर्यास का व्यटुलों पर केन्द्रित होणा कारण चैत तैं खुदेइ मैना बि बोले जांद।

चैत को सर्या मैना 'चैती पसार' को मैना होंद। मैत को औजि धियाण को नौन्याळ होण पर धियाण का सैसुर जैकि दान ल्हेंदो छै, सैत दान की भावना से कुछ चैती गाथा यनि छन जो दान का माथम तैं बतौंदन जन राजा बलि का गौरव कि गाथा—

*वो दान्यों मा को दानी राजा बलि दानी, दान्यों मा को दानी हो लो राजा कर्ण।
वो दान्यों मा दानि हो लो राजा बलि दानी, वून जिमि दान कैन, भूमिदान कैन बलि दानी।*

यनि राजा हरिशचन्द्र की गाथा वि गयेंद—

*दान्यों मा को दानि होलो राजा हरिचन्द्र
जैका होला सोना का छत्तर, मोत्यु का खल्याण,
माटो सि धन होलो, सागरों सि मन।*

दान का वास्ता दानि तैं मन से तैयार करणों। यनि उपमा लोक की यूं गाथों मा मिलदन कि कंजूस वि अपणा खीसाउंद हाथ डाळ इयो। लोक का कलाकार अपणां बार-ध्वार यनु वातावरण बणौणा का सल्लि होंदन अर यानै वूकि कंळ कि बर्ची रै।

चैती पसारा मा यि कलावंत ढोल दमौ कि वीं गमक का दगड़ि अपणा लोक की गाथों तैं गांदन यूं गाथों मा जादातर प्रेम की गाथा होंदन जन जीतू बगड़वाळ, कुसमा कोलण, रूकमिणी हरण, चन्द्रावलि, सूजु कि सुनारी, ब्रहमकौळ, सुरजकौळ अर गंगू रमोला।

चैती गायन की रयीं परम्परा से ही हमारा लोक की यि गाथा आज तक बर्ची रैगेन निथर यि कवि मिट जांदि। हमु तै हमारा गौरवशाली इतिहास का ये प्रसंग कबि सुणणो पढणों नि मिलदा। सदेई कि जब क्वासि कथा तारादत्त गैरोला जिन सैंकि कि रयीं पीढ़ि तैं सौँपि यो कथा गीत तौंको अपणा समय का औज्यू का मुख से चैत का मैना मा ही सुण्यू।

समय का दगड़ि जो बदलौ हवे स्यो लोक कि परम्परों मा बि हवे, नाचदो मैना चैत अब कखि-कखि नाचद दिखेंद, चैती गायन की परम्परा वि अगनै नि बढ सकि, बेड़ों का कंठ मा बच्यां चैती गीत अबि तक अपणि चमक्यकि अन्वार लहे कि मंच तक नि पौँछि सका हां श्रीनगर या चैती गायन की शुरुआत जरूर होणी, कुछ कलाकार ये पर काम करणा छन, लोक कि रयीं विधा पर काम करणै जरूरत छ यां पर टक्क लगैकि काम होलो त चैती गायन की परम्परा खूब फललि फूललि।

• गणेश खुगशाल 'गणी'



ये मैने धाद

- चैत अर चैती - 3

लोकमत - 5

चैत अर चैती

- नाचदो मैनु : चैतो मैनु - डॉ० डी०आर० पुरोहित 6
- फुलदेई - डॉ० नन्दकिशोर हटवाल 9
- चैत की परम्परा अर त्यवार - राकेश मोहन कण्डारी 11
- बीं आगद हर्यळि बांटद चैत - बीना बेंजवाल 14
- बीं माता जागरों मा 'घुंगुरजोळ' - राधा देवशाली 16
- चैती नृत्य गीत - केशव अनुरागी 18
- फ्योळि कि गाथा - नीरू कण्डारी 19
- राजभवन मा फूलदेई - मनोज इष्टवाल 21
- ऋतु गीत छन अनुभूति का गीत - गिरीश सुन्दरियाल 22
- सदेई - तारादत्त गैरोला 24
- मैतुड़ा बुलालि ब्वे - मनोज इष्टवाल 33
- चैती गीत - अनिल बिष्ट 34

समाज

- गढ़वाळि पछाणंक - डॉ० सुरेन्द्र दत्त सेमल्टी 35

कविता

- माटी की कया को बसन्त (बसन्त) ऐगे - कन्हैया लाल डंडरियाल 38
- फ्योळि - भगवतीचरण निर्मोही 39

इत्यास

- गढ़वाळ का इत्यास की कैला - कमल रावत 40

खबरसार

- चण्डीगढ़ मा उत्तराखण्ड महोत्सव - दीनदयाल सुन्दरियाल 44
- रोजगार से जोड़े जाण चयेन्दि भाषा अर संस्कृति - वीरेन्द्र पंवार 44
- कथा ग्रन्थ 'हुंगरा' को लोकार्पण - गिरीश सुन्दरियाल 46
- राजनेता भारतसिंह रावत को निधन - विमल ध्यानी 48

छपछपि पोड़णि छ

सम्पादक जी,

धाद का सोळा अंक पढ़ण मा ऐनी। छपछपी पणी छः। धाद का ये आन्दोलन मा लिखवारों, गीतांगों, साहित्यकारों को बड़ो योगदान छ। ये से भी बड़ो काम छ प्रकाशन को। व्यवसायिक युग मा यो धनसाध्य बि छ अर श्रमसाध्य बि। प्रतियोगिता मा रौण कि कूबत बि। ये कि प्रिंटिंग, गेटअप, ले-आउट, सभी कुछ प्रतिभा की बार-बार परीक्षा लेंदो। आप लोगों का धैर्य अर सांसा की दाद देंण पड़लि। प्रकाशन सामग्री को चयन देखिकन त एक आशा बणणि छ। बोलदा बि छन जैकी वाणी मा शहद, जिकुड़ी मा अमृत अर लेखनी मा धार होंद वो कबि मौरदा नि छन, अमर होन्दन। जिकुड़ी मा अबि तक कर्मभूमि, सत्यपथ, गढ़-गौरव, मैती, हिलांस, रंत-रैबार जना कई पत्र-पत्रिकाओं का असामायिक प्रकाशन बन्द होंण का कारण डाम पण्या छन। धाद कि अभी तक कि अन्वार से त आशा वणि छ अर यां से हमारि नै छवाळि तै हमार गौरवशाली लोकजीवन कि जानकारी मिलणी छ। यो सब संग्रहणीय छ अर हम जना पढ़दारों कि यां पर आत्ममुग्घता स्वाभाविक छ।

अन्वार, रेखाकन, कार्टून, सभी कुछ स्तरीय छन। पत्रिका की शुरूआत मा साहित्यकारों, मनीषियों की फोटो

क दगड़मा 'विचार' बहुत ही संवेदनशील छन। जुगराज रैनी दिदा।

रोजाना हमारदगड़ मा रौण वाळा दगड़या, कौथिगेर, गीतांग, उत्सवधर्मी लिखवार सभी लोग ये दर्पण मा कतना अच्छ लगण छन। बोले नी सकेन्दो। सामग्री संयोजन, चयन, विषय का अनुसार लेखदरों मा लिखवाणों अर सम्पादन बार-बार पत्रिका प्रकाशन की परीक्षा की चार छ। यां कि सफलता का वास्ता बधाई।

सम्पादक मंडलतै विज्ञापन, प्रचार-प्रसार, पाठकों की रुचि, हमार पर्व, त्योहार, जनमवार, लिखवारों की पुस्तक समीक्षा, गौ-गौळा मा ताशपत्ती खेलण वाळा, दारू पेंण वाळा बिगच्यां लोगु की दिनचर्या पर बि कलम चलर्यो चैर्णी छ। सोशल मीडिया का जमाना मा खट्टी-मिट्टी छर्वी-बथ बि 'धाद' की सामग्री तै और बि रोचक अर ज्ञानवर्द्धक बणै सकदन।

काफी-कुछ आशा छन।

• चक्रधर कंडवाल

लोकभारती सदन, देवी मंदिर, कोटद्वार


सम्पादक जि

सादर नमस्कार अर सेवा सौळी,

धाद त धै लगै कि फटाफट पहुँच जांदी, वांका वास्ता धन्यवाद। सबि धाद पत्रिका पढ़णा बाद जिकुड़ी मां इन्न छप छपी पड़ी कि पूछ ना। आपको प्रयास व गढ़वाळि लेखदारों को उल्लास देखी लगदो कि हमार बीच नै पीढ़ि बि कथगा नया विचारों का साथ औणी छ। भै जुगराज रैन सि सबि लिखदरा, तौं से उम्मीद करे जांदि कि अपणा अंग्रेजी पढ़दरा नन तिनों तैभी अपणि बोली भाषा को पाठ पढ़ाला, अपणा अच्छा कार्यों का साथ अपणी बोली को बोलकरी हम सम्मान दे सकदौं। सबि लिखदरों तै अंका उत्कृष्ट लेखन का वास्ता भौत बधाई अर होली का त्यौहार की गला मिली शुभकामना। ह

• सुलोचना परमार उत्तरांचली

प्रकाश विहार, धर्मपुर, देहरादून



नाचदो मैनु : चैतो मैनु



डॉ० डी०आर० पुरोहित

चैतो मैनु उत्तराखण्ड का डांडा मुलुक मां बार त्यौहार, चैती पसारा और फूलदेई का त्यौहार का मैना का तौर पर देखे जांदो। ये मैना हमारा मुलुक मां चार बकिबात का उत्सव होन्दा।

1. चैती गायन या चैती पसारा
2. बीं माता को उत्सव
3. फूलदेई
4. भिटोली का आला परम्परा

1. **चैती पसारू** : चैती पसारू अब टोन्स अर यमुना घाटि का कुछ ही गों मा रै गे पर एक जमाना मा गों-गों मा हमारा औजी अर बेड़ा लोग बसन्त का स्वागत मा ऋतु गीत गान्दा छ गों की हर खळि मा गीत अर नृत्य दिखौन्दा छ, जै का बदला मा गों का लोग यूं कलाकारू तैं दाळ, नाज, झंगोरु, कोदु, जौ, तिल, गुड़, मर्च, मशाला, लूण, तेल, अर घयूं देन्दा छ। बगत का दगड़ि होयां बदलौ, आर्थिकी का बदलौ का दगड़ि यों कलाकारू को उचित सम्मान अर उचित अनाज न मिलण से या परम्परा जरा-जरा कै हरचि गे।

या परम्परा कतना सुन्दर छै गोनगढ़ पट्टी का स्व० सेवादास जी न सुणाई थौ कि चैत का पहला दिन चौक मा पैलूगीत होन्दो थौ-

धरती आकाश की औ सेवा बोदान:

भूमि भूम्याल की औ सेवा बोदान:

टीरी माराज की औ सेवा बोदान:

फेर फ्यूंळि फूल की गाथा सुणाई जान्दि थै-

आसन्ती का पाटा गौलु में बासन्तिका पाटा

सौरारू का पाटा गौलु में गौरारू का पाटा

हे राजा धामदेव की जरमी स्या फ्यूंळि रौतेली

हे आम जैसी आम छै वा दिवा जैसी जोत

हे नौणि जी लुटकि जरमी फूलों सी कुटकी

हेमंगल्वाडा तितरि जरमीं दिस्वाळ सी ऊंमी।

जन्म : 8 अगस्त, 1953
कृतियां : रामलीला से रंगमंच की शुरुआत 1985 मा, शैलनट की पैलि कार्यशाला, आपका लिख्यां 4 नाटक विद्यालय मा प्रस्तुत, ICRR दिल्ली की सलाहकार समिति का सदस्य, इन्दिरा गांधी राष्ट्रीय कला केन्द्र दिल्ली का शोध निदेशक रैन.

सम्प्रति : हे०न०ब०वि०वि० श्रीनगर मा (अंग्रेजी विषय का प्रोफेसर).

चैत अर चैती

श्री शिवचरण अर स्व० बचनदेई जना बेडा कलाकार शिव मन्दिरों मां झुरमुर मु देवता जागरण को गीत गान्दा छ-

**बीजी गैन बीजी गैन खोळि का गणेश जी
व्हेगे देवतों असनाणा बेर जी।
चला देवतों ढोलू समुन्दर जी
व्हेगे देवतों असनाणा बेर जी**

चैती गायन मा सबसे खासगीत होन्दो छौ सदेई गीत। ये गीत तैं कुमाऊं मा गोरी धना अर बाळा सदेउ का गीत का रूप मा गांन्दा छ। सदेई गीत अनाथ सदेई अर सदेउ की कथा पर आधारित छ। बाळि उमर मा ही द्वी भै बैणा अनाथ व्हेगे छ। सोरा-भारू न सदेई को ब्यौ करि दूर मुलुक भेज दीन अर वौंकि घर कूड़ी को आपस मा बंटवारू करि दिनि। अनाथ सदेउ पूरा गौं मा मांग- मांगी गळखि खाणू रै। हर साल चैत का मैना जब दूरूराणि-जिठाण्युं का भै भिंटोळी लेकि औन्दा छ त विचारि सदेई अपणा भै को बाटू हेरदि ही रै जान्दि छै। बारह बर्ष बाद एक दिन बाळों सदेउ अपणि बहण सदेई का सैसुर पौछंद त सदेई न भावुक हवे कि अपणा सैसरू मा बोलि कि तुम बोल्दा छ न कि मैं झूठ बोल्दू कि मेरू बि भै छ। देखा आज पौछिगे मेरू भै। दूरूराणि जिठाणि सदेई का भै देखी जळण लगिन अर तौन सदेउ का खातिर खीर पकाई अर वैमा जैर मिले दिनी। खीर खान्दि वे जैर से सदेउ मरि गै सदेई न जब अपणो भै देखी त वीन बि पाणि की गागर मुंड मा धरि, ताल का छोड़ गै अर खाळा फांळ मारि प्राण घात करि दिनि। यो गीत लोक का क्वांशा गीतु मा प्रसिद्ध गीत छ-

**दूजा ग्रासन छाळा फाळ दीनी वै हो
हे जित सदे बैणि गागर उठाई जी
सदै गैल पाणी नौं का ताल जी
सदै बैण त ताल डूबो गई जी
सदेउ भै त कफू चाडो व्हे गे जी
सदेई बैणी कि मेल्वड़ी बणी जी**

ये का अलावा बास बास मेव्लड़ी, रामा पिरमी, राजा हरिश्चन्द्र, हरण कश्यप, राम बलराम, का गीत बि ये मैना गयेन्दा छ। ये मैना औजी लोग गांव की दिशा की पैलि सन्तान पुत्र होण पर धियाण का गौं मा जैकी तीन दिन का दिशा बढै अनुष्ठान का अतिथि बणदा छ रीं बढै मा बि तीन दिन तक चैती गीत गांदा छ। कुर्माचल मां बि यन्नी

परम्परा छै। पर यूं गीतों को नौ रितुरैण छौ जु अलग धुन मा गयेन्दा छ। रितु रैण का द्वी गीत भौत लोकप्रिय छन-

(एक)

एक धियाण देळि पर बासदा कौवा से बोल्दी
देळि थैं कव्वा किलै वांस छै
नी बास कावा कांव
बाबु होना त बालौउं औना
ना बास कावा कांव कांव
को मागी चेली कै पास औना
ना बास कावा कांव कांव
बैणी हुनी त संग लि औना
कोउ च तेरो धाम

(दो)

धियाण बसन्त ऋतु औण पर अपणा मैत से भिटोली औण की आस करणी-

रितु ऐगे हेरि फेरि, हावै रंगीली चैत की
याद मैके भौत ऐगी या आपणा मैत की
भिटोली को मैनों मितैण नारैण एगी रितु रैण।
भिटौली/आला परम्परा मा हर हालत मा भै लो
स्वाळी, पकौडी, अरसा, गुलथ्या, कणकू लेकि चैत
का मैना धियाण का ससुराल जांदा छ। निरमैत्या
धियाण तैं क्वे भी भिटौली लेक नि जान्द छौ।

चैत का मैना फूलदेई सबसे अलग छ। चैत की संग्रान्द से लेकर आठ गते चैत तक गौं का छोटा-छोटा नौन्याळ घाम औण से पैली सैरा गौं की देळ्यो मां फूल डालदा छ। यिं फूल कुरौंजी मां मेटी घरेन्दा छ। व्यखुन बगत या झुरमुर मां। फूल डाळदा द बच्चा अलग अलग इलाको मां अलग अलग गित गान्दा छ।

1. केदार घाटी:

घोघामाता फूल्यां फूल
देदे माई दाळ चौंळ

वल्या खोळा-पल्ला खोळा घोघा नचायो
घोघा पुजारी म्वारू न तडकायों

2. लस्तर घाटि:

घोघा माता फूल्यां फूल
घोघाबोल्दों कींगा फूल

हम बोल्दा फ्यूळ्या फूल
ताम्बै तौली फरफरू भात
खडु उठा छोरों खुलिगे रात

3. कुमांड एवं दुशान्तः
फूल देई छम्मा देई
दैणी द्वार भरी भकार
यीं देळी तैं बारम्बार नमस्कार!

पुंगडू अर जंगल मां फूल निकाल्दी दा यन गीत बि
लगदा छः

1. केदार घाटीः
चला फुलारी फूलों क
सौदा फूल बीणला
म्वारू का जूठा फूल ना बीण्यां
भौरू का जूठा फूल ना बीण्यां
2. भिलंना घाटीः
चल फुल्यारि फूल्लुकः
देवता औंद झुल्लुकः
सेरा लाइ सीधी कूल
पार्या डांडा घाम लैगि
अब धोयन्दा सादा फूल
चल फुल्यारी सटबट घौरः
उन्ड फुन्ड बाधै की डौरः

देळि-देळि पर फूल डालण का बदला सभी घरू से
दाल, चॉल गुड, घी, तेल, मिर्च, मशाला और नमक भेंट बि
मिलदि जै को केळाख आठवां दिन जंगल की तरफ भोज
पकोण मा इस्तेमाल करे जान्दो। लजीज पकवान बणौन्दा
अर बच्चा बाग को स्वांग गणैकि एक दोसरा तैं डरौण को
नाटक भी करदा।

केदार घाटी मां ये अवशर पर हर गौं या खोळ की
एक डोली होन्दी जै तैं घोघा या घोघा की डोली को नाम
दियों च। घोघा असल मां स्त्रीरूप विधाता को च जैं तैं बि
माता भी बोलदन। माणे जान्दों कि संसार मा सभी बच्चु
भेजणो काम घोघा माता करदी अर बाल पन मां तों तैं
हंसौणः, कुतग्याळी बि देन्दी। यीं घोघा डोली गौं का दानी

लोगु द्वारा बणाये जान्दी छै। अन्दरवाडी गौं कि डोली कैं
जमाना मा स्व० बाववानन्द सेमवाल द्वारा बणये गै छै बल।
सबसे चमत्कारी डोली रांसी गांव की माण्या जान्दी छै बल।
लड़का लोग धौती पैरी डोली तैं कान्धि मां धरि खौळु-खौळु
नचौन्दा अर बि देवता औण को अभिनय बि करदा। फिर
नंवा दिन या डोली भितर धर्ये जान्दी।

कालीमठ गौं मा डोली नि नचर्येदि। यख लक्ष्मी मन्दिर
का भैर धरयां छोटा छोटा दुंगा ही घोघा माण्या जान्दा अर बि
खोळु-2 नचाया जान्दा। पिछला दस बरसु बटि होली हिमालय
नौं की संस्था गुप्तकाशी मन्दिर मां हर वर्ष फूलदेई उत्सव
को आयोजन करण लगी। ये आयोजन मां पूरा इलाका की
70-80 घोघा डोली भाग लेंदन। येही तरह को आयोजन
कलश संस्था रूद्रप्रयाग तथा के०न० भट्ट मैमोरियल स्कूल
जखोली वळ बि कई वर्षों से करणा छन। ये वर्ष त राजभवन
मां भी बच्चों द्वारा फूलदेई उत्सव मनाया गै।

फुलदेई उत्सव मां इना कलात्मक और उत्सवी तत्व
मौजूद छन कि यो अन्तर्राष्ट्रीय महत्व को उत्सव बणि सकदु।

चौथी परम्परा बीं माता की च। मल्ला कालीफाट का
अन्द्रवाडी द्यूसाल अर रवि गौं मां हर तेसरा बर्ष बीं माता को
पन्द्रह दिनौः को जागर अर पूजा अनुष्ठान होन्दः। चैत संग्राद
से लेकि पन्द्रह ति तक चलदः। ये अनुष्ठान को आयोजन
संतान की आश बलि क्वे बि दम्पति कर सकदि। हर दिन
बीं माता का सामणि रात मां बीं माता/विधाता का जागर
गायेन्दा। जागर की शुरूआज तुलसा, बींमाता को दोसरू नौं
से होन्द। लेकिन ये से पैलि तीर्थ स्मरण बि गायै जान्द।

**हाथ तुलसा, पांय तुलसा सिर जम्पे माल
तुलसा को रंग भूलौ श्रीकृष्ण गोपाल**

जागर गायन मां श्रीकृष्ण का जन्म और कंस से संघर्ष
की गाथा गाये जांद। बीच-बीच मां धुंधरू जोली (घुंधरू
जोड़ी) को जागर और मंचन भी करे जांदू। घुंधरू जोली एक
सन्तानहीन स्त्री की कथा च। अपणि होण वाली संतान का
वास्ता विचारि जनानि एक जोडी घुंधरू बणौन्दी अर हमेशा
अपणा पागड़ा पर धरदी। लोग तैंकु ठठा लगौन्दा। एक दिन
बींमाता तैं तैं दया करीक सन्तान को वरदान दे देन्दी।



फुलदेई



डॉ० नन्दकिशोर हटवाल

भा रतीय परम्परानुसार पूरा भारत मा बसन्त को आगमन बसन्तपंचमी का दिन बटी माणी जांद पर अपणि अलग भौगोलिक स्थिति का कारण बसन्त पंचमी का दिन पूरा उत्तराखण्ड मा ह्युं अर ठण्ड का दिन ही रौंदा। वानस्पतिक अर प्राकृतिक रूप से बि बसन्त का आगमन की क्वे सूचना ये दिन नि मिलन्दी। जबकि बसन्त की प्रतीा ये पर्वत प्रदेश का रैबास्यों तैं बड़ी बेसब्री से रौंद। हो बि किलै ना, यो बसन्त ही छ जो रीं धरती को श्रृंगार करद। कौपांण वाळि निगुरि ठंड से मुक्ति दिलौंद। पतझड़ से खणखणा होयां डाळों पर क्वंपळा मौलौंद, पीला घास का पात हर्यां हवे जांदा। अर जो सबसे बड़ो परिवर्तन औंद वो यो कि ये मौंका पर बनि-बनी का फूल खिलि जांदा। खास कै भीटा पुंगड़ों मा जब फ्यौळि खिलदि त ये तैं बसन्त का औंणै की सूचना माणी जांद।

फागुण का मैना का आखिरी दिनों मा फुल संगरादं का वास्ता रुड्या हथकण्डी फुलकण्डी अर छोटी-छोटी टोकरी बणे तैं ब्योचणों तैं गौं-गौं जान्दा। फागुण का मैने की आखिरी ब्यखुन नौना पुंगड़ों का किनारों, बाग-बगीचों अर बंणों मा फ्यौळि, बुरांश, लया, आडू, पंय्यां, सेमल, सेब,धौला, ग्वीराळ जना बनि-बानि का फूलों तैं ल्ये तैं फुलकण्डी मा पाणी का छींटा मारी भैर टांकी देंदा। दुसरि तरपां ननतिन रातभर फुलसंगरादं कि सब्येरी को जगवाळ कना रौंदा।

दूसरा दिन सुबेर-सुबेरी नोनों की टोली फुलकण्डी ल्ये तैं म्वोर-म्वोरों, घौर-घौरों फूल डाल्दी। फूल डाल्दा-डाल्दी गंदा बि-

फुल-फुल मायी दाळ दे चौळ दे, दाळ दे।

ये का बाद फूल डळीं देळि का चौक-आंगन मा गोळ घेरा मा बैठी जांदा अर गांदा-

फुल-फुल देवी, बड़ी-बड़ी पक्वड़ी,

फुल-फुल माई, दाळ दे चौळ दे।

फुलदेई-फुलदेई, तुमरू भकार भ्वरि जै।

- जन्म : ग्राम तपोण, पो० लंगसी, चमोली-गढ़वाल.
 कृतियां : उत्तराखण्ड हिमालय के चांचडी गीत एवं नृत्य, चमत्कार (बाल कहानी).
 सम्प्रति : माध्यमिक शिक्षा विभाग मा कार्यरत.



फूलदेई-फूलदेई हमारा टुपरा भवरि जै।
 फूलदेई-फूल देई फूल संगरांद
 सुफल करो नयो साल तुमकू श्री भगवान।
 रगीला सजीला फूल, ऐगीं
 डाळा-बोटळा हर्या ह्वेगीं।
 पौन-पंछी, दौड़ी गैना,

डाळ्यूं फूल हेंसदा ऐन।
 तुमारा भण्डार भर्यांन,
 अन्न-धन्नल बरकत ह्वैन।
 औंदा रओ ऋतु मास,
 औंदा रओ सबकू संगरांद।
 बच्यां रौंला तुम हम त,
 फेर होली फूल संगरांद।

तब वे घौर वळा एक भाण्डा मा ग्यूं, चौंळ, कौंणी,
 झगोरु, ल्योदा अर नौनों की टोकरी उंद डाल्दा। पैली
 रिंगाल की टोखर्यू मोळ माटान लिपि तैं कमेड़ा, हल्दा कि
 पिठैं न सजौंदा बि छ।

उत्तराखण्ड का कुछ क्षेत्र मा सात दिन तक अर
 कखी-कखी मैनाभर तक बि फूल डाल्दा। फूल डालण का

बदला जो सामाग्री मिल्दी वेकू उपयोग घवोगा कि पुज्ये मा
 ह्वंद। चैत का मैना कै दिन बाँण मा जै तैं नौना सामूहिक
 रूप से घवोगा की पूजा करदा अर हलुवा बणौंदा। घवोगा
 ग्वेरु को द्यव्ता छ जो शायद बाघ छ। बदलेंदा बक्त का
 दगड़ फूलदेई मा अलग-अलग तरीका से रीं सामाग्री को
 उपयोग हवोंण बैठी।

पैली फूल संगरांद का दिन बटी औजी चैती गाण की
 परम्परा बि हवोंदी छै। फूल संक्रांति का पर्व बटि ध्याणियों
 तैं आलू-कल्यों द्योण कि परम्परा बि शुरू हवे जांदी। कुमाऊं
 मा ये तैं भितौली बोल्दा। फूल संगरांद का दिन बटी ध्याणी
 भितौली को इंतजार शुरू करी देंदि-

डांडू फूले फ्योळडि,
 गाडू बासे न्योळडि।
 मैनो आयो चैत को,
 खुद लींग च मैत की।
 हरी ह्वैन डांडी फुलु की,
 में खुद लगीं च भुलुं की।
 कब मैत मी जांदु नी,
 बबा में बुलोंदु नी।

फूल संक्रांति का दिन बटी ध्याणि 'दीशा-भेंट' का
 वास्ता अपणा मैती 'औजियों' को इंतजार बि करण बैठदी।
 मैती औजी ये दिन बटी दीशा भेंट तैं जांदा छ।

ये पर्व तैं बनि-बानि का पौराणिक प्रसंगों दगड़ा
 जोड़ी तैं बि देखी जांद। पार्वती द्वारा शिव तैं प्राप्त कन का
 दिन यानि पार्वती द्वारा शिवजी तैं पुष्पार्पण दिवस का रूप
 मा बि ये पर्व तैं देखदा। और बि कथा जनश्रुति ये पर्व का
 बारा मा प्रचलित छन। एक जनश्रुति या बि छ कि पर्वतराज
 हिमालय की पुत्री पार्वती न शिव तैं पति का रूप में पौंणों तैं
 बारह बसन्तों तक कै किसम का फूल ल्हेकि शिव की
 अराधना करी अर चैत का मैना संगरांदी का दिन शिवजीन
 पार्वती तैं पत्नी का रूप मा स्वीकारी।

अब त सामाजिक आर्थिक बदलाव का कारण ये पर्व
 मनोण का तौर तरीका भी बदलणा छन। हम ये पर्व तैं फूलों
 को पर्व, प्रकृति से जुड़्यूं बसंत का स्वागत सत्कार को
 त्यवार बि बोलि सकदा। रीं संक्रांति बटी भारतीय संस्कृति
 को नयो साल बि शुरू होंद। ये वजह से यो दिन साल को
 पैला दिन का रूप मा बि मनायी जांद।

□□

चैत की परम्परा अर त्यवार



राकेश मोहन कण्डारी

चैत का मैना आन्दिसार पाड़ की डांडि-कांठि रंगिला पिगंला फुल्लुन लक-दक्क हवै जांदिन, फ्यूंळि का फुल्लुन सैर्या भीटा-पाखा पिगंला, अर बुरांशी का फुल्लुन सैर्या बण लाल चचकार हवै जांदन। चैत का मैना तै पाड़ी लोखु को नयु वर्ष को पैलो मैना, बि मणै जांद, किले कि चैत प्रतिप्रदा बटै, पाड़ी नयु वर्ष बि लग जांद, चैत को मैना द्यो देवतो को मैना भि बोल्ये जांद, चैत का मैना का नवरात्रा बड़ा पवेत्तर मने जांदन, ये ही कारण सि चैत का मैना को नवरात्रों मा देवी का मन्दिरू मा बड़ी भीड़ रैन्द अर कै थौळ, मेळा उरैदिन, पाड़ का जै भि दिशा मा दुर्गा देवी अर दक्षिण काली का मन्दिर होला चैत का मैना यू मन्दिरू मो कौथिगेरू की लंगत्यार लगी रैंद, यां का अलावा चैत फुल्लु को मैनु भी छ, त सैर्या पाड़ी ईलाकों मा चैत का मैना फुल्लु का उच्चव त्यवार उरैदिन, हर गौं कि छवटि बाल कन्या बानि-बानि का फूल कट्टा करी कि हर घौर की देळि-देळ्यों मा फूल डाळदिन फूल डाळणै कि या परम्परा कब अर कैल शुरू कै होली यु त पता नी पर इथगा बोल्ये सकदु कि या परम्परा साढ्युं पुराणि चा। कखि-कखि सैर्या चैत का मैना त कखि आठ दिन तक फूल डाळणै अर सगुन गीत लगाणै की परम्परा आज भी जीवित छ।

पाड़ मा चैत को मैना बेटी-ब्बारियों तैं सर्मपित छ, सैरास मा सासु का झझकारा, काम धन्धा को बोझ, गाजी, बाछी खेती किसानी का दन्दोल से दुःखी बेटी, ब्वारी वड़ी वेसब्री से चैत का मैना को इंतजार कनी रैन्दीन, कि कब चैत को मैना आलो अर वु अपड़ा मैत जाली।

पाड़ मा आज भि या परम्परा जीवित छ लोग चैत का मैना जरूर अपड़ी ध्याणियों तै मैत बुलांदिन अर कपड़ा लत्ता अर कल्यो दे कि विदा करदिन, आज भी पाड़ मा बुड्या ध्याण तै चैत का मैना का कल्यो जरूर भेज दिन।

चैत का मैना पाड़ मा चैती गीत लगाणै की परम्परा छ, हांलाकि नया जमाना अर पश्चिमी संस्कृति का प्रभाव का कारण जरा जरा कै धीरा या

जन्म : 30 जून, 1971
 शिक्षा : एम०ए० अंग्रेजी, हिन्दी,
 बी०एड० व पत्रकारिता
 स्नातक
 प्रकाशन : पुनाड़ से रुद्रप्रयाग
 सम्प्रति : प्रभारी प्रधानाचार्य, रा०उ०
 मा०वि० पालाकुराली,
 रुद्रप्रयाग
 सम्पर्क : मो० : 8650416124.

परम्परा खतम होणी छ पर घर गौं मा आज भी औजी अर वाद्दी चैती पसारा गीत लगादिन अर कुलाचार बोलदिन, चैती गीतु मा ऋतु वर्णन, खैरी अर विपदा का गीत-बेटी का ब्वारियों का खुदेड़ गीत, फ्यूंळि, जस्सी, सदेई, सरू कि गाथा का गीत लगाएदान।

चैती गीत

चैती गीत लगाणै कि परम्परा सदियों पुराणी छ, जुग-जुग बटिन हमारि लोक परम्परा का वाहक औजी अर वाद्दी चैती गीत गाणा छन, यूं गीतु मा लोक मंगल की कामना, रंगिली पिंगली बसन्त बार को वर्णन, बेटी-ब्वारियों की खेरी, विपदा अर दन्दोळ को वर्ण। मायादारू की माया का गीत, अर जब ढोखरा, पुंगणो का तिराळ ढिसाळ वीटा पाखों पर फ्यूंळि का फूल खिलदान वण मा कप्फू अर हिलांस बासदान बेटी ब्यारि मैत की याद मा व्याकुल हवै जांदिन, मैत की खु मिटाण का वास्ता वेड़ा लोक चैती गाथा सुणांदिन, यूं चैती गीतु मा दुःख विपदा, सैरास की खेरी, सासु का व्यंगवाण को वर्णन भी रैद, चैती गीतु को शुभारम्भ कुलाचार से होन्दो।

कुलाचार

कुलाचार मा दान, वंशवृद्धि अर लोक की मंगल की कामना का भौ रैदिन, वेड़ालोग घौर-घौर मा जैकि वशांवाळि की जैकार, खेती किसानी अर पशु वृद्धि की कामना को गीत लगांदिन।

*मंगलाचार, मंगलाचार, वड़ा दरबार।
बेटों को राज बढे,
पोतान फूले फले,
कुल का देवता नेह करे,
दाता गुण से भरपूर रयें,
छत्री का हाथ मा शक्ति रयें,
नंगौ ढकोण, भूकों पत्यौण मराज,
नंगा मा मास नी, डला मा घास नी,
जै जै लान्दु मराज जै जै लान्दु मराज।*

चैत का सैर्या मैना वेड़ा, वाद्दी अर औजी लोग अपड़ा साज बाज ढोल, दमौ, हुड़का डौर थाळी का दगड़ा घौर-घौर जैकी गीत लगांदिन यु चैती गीत सुवेर वटि व्याखुनि दां तक

लगाए जांदन, सुवेर का वगत का गीतु तै प्रभाती अर व्याखुनी दां का गीतु तै श्याम कल्याणी बोले जांद।

प्रभाति

रबी भानूं काठों चढ़ी ऐगेंन देवी सीता जी,
वीजी गैन पंचनाम देवा हे देवी सीता जी।

श्याम कल्याणी

जें माता सकल भवानी,
जल-थल उदयी भवानी,
जै माता सकल भवानी,
द्यूळ थाल कपास की बाती,
सवा गज की जोत जगाई माता सकल भवानी
जै जै माता सकल भवानी।
माता को रिंगदो छत्तर चढ़ायो जै माता सकल भवानी
दवतो की तु ध्याणी भवानी माता सकल भवानी

कुलाचार

हे..... ठाकुर जी.....
सुरीज काठों मा चढ़ि ग्यै,
पंचनाम द्यवतों को सुभिरण करदो
खौली का गणेश को सुभिरण करदो,
तुम्हारा भण्डार भरयां रयां,
अन्न का भकार भरयां रयां,
तुमरौ राज बढै,
बेटो को ताज बढै,
नाती पूत सन्तान राजी रयां,
गौ बढै गाजी बढै,
अन्न का भण्डार भरयां रयां,
दाता का हाथ ठाडा नि हुड़यां....।

सगुन गीत

आवा कागा, बैठा कागा हरियां बिरिछ
वोल कागा वोल चोदिस सगुन
त्वै द्यूलो कागा, में दूध भाती पूरी
वोल कागा वोल कागा चौदिस सगुन
विचारा ब्रहमा जी काग की वोली
सगुन कागा सगुन बोल.....

जय-जयो शुभ घड़ी आई,
जय-जयो शुभ दिन आयो,
मट्टी को दीवा कबास की बाती,
तिलु को तेल जागो दिवा सूरी-पूरी रात,

फुलदेई त्यौहार

चैत का मैना तैं रंगिलो चैत वी बोले जांद किलै कि ये मैना डांडि काटियों मा बनि-बनि का फूल खिल्या रेंदन, गढ़वाळ मा चैत का मैना छुट्टा-छुट्टा बाला अर कुंवारी कन्या वानि-वानि को फूल चूण्डि की तै देल्यो-देल्यो का रोज फूल डालदिन, यूं फुल्लु मो फ्युंळि, बुरांश, सिलपाड़ा, पाषाण भेद, गेंदा, गुलाब का फूल अर जख जु फूल मिल साकु, बच्चो की टोलि देल्यो-देल्यो पर जैकि फुलदेई छमादेई देणी द्वार भर भण्डार गीत लंगादिन, अर दगड़ा मा अपड़ा धोधा देवता तै भी नचाणा रेंदन, धोधा फुल्लु को देवता मणै जांद फुलदेई त्यवार को अलग-अलग ईलाको मा अलग-अलग रिवाज छन रूद्रप्रयाग, चमोली मा चैत मैना का आठ दिन तक बच्चा फूल डालदिन आठवां दिन अठवड़वा पर्व मनाए जांद, लोग बच्चो तै चौल, गुड, तिल, फल अर रुप्या भेट करदिन। आठवां दिन अठवड़वा पर्व पर बच्चों को समुहिक भोज का दगड़ा समापन्न हवै जांद वही पौड़ी का ईलाकों मा फुलदेई सैरया चैत का मैना मनाए जांद।

कुमांडनी

फुलदेई फुलदेई तुमार भकार भरी जैं,
हमार दुपर भरी जैं, फुलदेई फुलदेई
फूल-फूल डेली यो डेली कैं नमस्कार
दैण डार भरी भकार।
तू डेली अली रैं, मैं चेली पूजनी रौ,
तू डेली लो नमस्कार।

हरियाली पूड़ा

हरियाली पूड़ा चैत का मैना को प्यार च, यु त्यवार चमोली जिल्ला को नौटी गौं मा उरेंद, नौटी गौं मा नंदा देवी

को मन्दिर छ, हरियाली पूड़ा ध्याणियों को व्यवहार छ, सैरया गौं को लोग अपड़ी ध्याणियों तै मैत बुलदान अर ऊं तै भोज दै कि कल्यो का दगड़ा विदा करदिन।

अंयार पूजा

अंयार पूजा चैत का मैना 20 गते उरें जांद, यु उत्सव खेती-किसाणी पशुपालन करण वळा उयौदन, चैत का आन्दिसार डाळि-बोटळियू मा मौळयार ऐ जांद, अंयार की कुंगली पत्ति विषधारी होन्दीन, अपड़ा पशुधन की रगछ की खातिर किसान लोग अंयार को दही, नौण कट्टा करी कि हलवा, पूरी, खीर को भोग लगादिन अर सामुहिक भोज को आयोजन भि करै जांद, ये औसर पर एक स्वांग को आयोजन भि करै जांद, जै मा एक आदिम बाघ बणदो, अर अपड़ा गिच्चा पर भुटखाजा भौरि कि हूँ, हूँ, हूँ कि आवाज करदो, गौं का लोग वै का पिछने जगदु गोसु चुलांदिन।

सण्टा

चैत का मैना पाड़ की सब्बि बेटी-ब्वारी अपड़ा मैत जरूर जांदिन, नयि ब्योलि तैं चैत का मैना सासु को मुख देखण वर्जित छ, ये वास्ता चैत को मैनु लगण से पैली ब्वायू तै मैत भेज्ये जांद पर कबि इन समय भि आन्दु या क्वी भौत बड़ी मजबूरी हो कि ब्वारि मैत नि भेजे सकि त इनि परम्परा च कि सासु अर ब्वारी आपस मा क्वी कपड़ा, अगुंठी, कड़ा, कन्दुड़दरा आपस मा सण्टें दिंदान।

बीं आगण

चैत मा ध्याणियों तैं मैत बुलाण को रिवाज छ, चैत का मैना बीं माता तैं न्युतु देकि घौर बुलाए जांद अर पूजा पाठ करी की उत्सव का रूप मा कपड़ा लत्ता अर कल्यो देकि विदा करण की परम्परा छ, बीं को मतलब छ वरदानी मां, विधाता, सन्तान देण वाली मां, हर तिसरा वर्ष उरेंण वांळि रीं लोक परम्परा का अनुसार गौं को क्वी एक मवासू बीं माता तै अपड़ा घौर बुलाणको न्युतु देन्दु, इन बुलै जांद कि जु मौ बीं माता तैं न्युतु देन्दू वै का घौर मा सन्तान की प्राप्ति होन्दी।

बीं आगण हर्यळि बांटद चैत



बीना बेंजवाल

फूल संग्रांद से बिख्वौत तक हरेक दिनबार तैं सौदा-सौदा फूलों कि तराँ संस्कृति कि सिंयारी पर गंठ्यौण को चैत को फुलारी मांगळ-जागरौन उलछुल भरीं अपणी फुलकण्डी ल्हीक जब हमारि डेळ्युं पर पौँछद त् हुगडि जंदन हमारि द्वार-मोर, कंदुडि अर जिकुड्यो पर लग्यौं ताळा। 'फुलफुल माई...' बोली भैर डेळ्युं पर फूल सजौंदा फुलारी भितर मन तैं बि फ्यौली-बुरांस का रंगौन लपोड़ी रंगमत्त बणै देंदन। धियाण्यो कि भेंटोली बंधेण लगदिन। नौबत बजण बैठदि। बसंत कि कलबली सार का ये चैत का मैना हमारि गौं द्यूसाळ, ममाकोट अंद्रवाड़ी अर बुबाकोट यानि पापा जी का ममाकोट रबिगौं 'बीं अगेंदि'। 'बीं आगण' मतलब 'बीं माता' तैं जागरौं मा मैत न्यूतण। बीं माता यानी विधाता। जो संतान को वरदान देण वळि माता छ। चैते संग्रांद बिटि 13 या 15 दिन तक बीं माता जागर लगदन अर फेर धियाण कि तराँ बिदा कर्ये जाँदि। खास भौण मा गये जंदा यो जागरौं मा इनि अद्भुत फक्ति हौंदि कि भैर-भितर दिब्यता को उद्यो हवे जंद।

हमारि गौं मा जाख अर विंध्यवासिनी का द्यूळ बीं अगये जाँदि। गौंकि जु मौ संतान प्राप्ति का वास्ता बीं आगदि। स्या सबसे पैलि चोपडु माटु ल्यौंदि। ते माटा गूंदी तैं चौकला मा गणे। जी, बीं माता अर बीं माते चेली बणये जंदिन। तब वे चौकला मा अर टोखरी, पुड़खी कोणज्युं पर जौ बुत्ये जाँदन। एक गत्ता पर बीं माता अर वींकि चेली कि आकृति उकेरी वीं हर्यळी दगडि रख्ये जाँदि। बौडा श्री घनश्याम देवशाली जी बीं माता अर वींकि चेलि कि आकृति बणौंदन। पैला दिन हरिद्वार बिटि क्यदारे कोड़ी तक दिवा बरतदन। सब्बि द्यू-द्यूबता सुमिर्ये जाँदन। अलग-अलग दिन देवगाथा का हिसाब से जागर लगदन। जैमा भगवान कृष्ण कु जनम, गौरा कु जनम, वींकु बाळपन, घुंगुरजोळ, चम्पा डाळी, गौरा-शिव को ब्यो, बारामासा गये जाँद। सुबेर पूजा हौंदि अर ब्यखुनि आरती। फुलारी फूल ल्यौंदन। माळा बणौंदन। तब बीं माता तैं बिजाळये जाँद-

उंचा-उंचा फूल कमरि उंचावा
निसा-निसा फूल कमरि न्यूडावा

जन्म : 17 नवंबर, 1969 (देवशाल)
कृतियां : मुटठी भर बर्फ, कमेड़ा
आखर. गढ़वाली-हिन्दी
शब्दकोश.
सम्प्रति : केन्द्रीय विद्यालय, श्रीनगर,
गढ़वाल
मो० : 9458343964.

चैत अर चैती

उंचा-उंचा फूल घुग्यास्यून ब्यूणा ।
सौदा-सौदा फूल सिंयारी गंट्यावा
बासी-बासी फूल स्यमली स्यळावा
पैलि कि सिंयारी तुम बीं माता चढ़ावा
तब कि सिंयारी तुम चेली तैं चढ़ावा ।

यों जागरों मा बाळा से लेकर दानों तक सब्योँकु उत्साह
देखण लैक रैंद । छटा दिन गौरा का रांसा लगदन-

गौरा को मंगण्या आये कैलास को शम्भु
कैलास को शम्भु में द्यौणो ना बोल्या
भंगफुक्या जोगी क बुबा में द्यौणो ना बोल्या
हिंया का हिवाळा बाबा में द्यौणो ना बोल्या ।

रात आठ बजि बाद गौं का बीं आगण वळि जगा पर
कट्ठा होंदन । यि जागर कखि लिख्यौं नि छन । गौं का
दाना-स्याणों तैं यि मुखागर छिन । रात बीं माता तैं स्यवौंदन ।
सुबेर पूजा करी बिजाळदन । द्यूसाळ पिछला साल लिहयेगे
छे बीं । ये साल अन्द्रवाड़ी छन आगणा । पन्दरा-सोळा साल
बिटि बीं का जागर गाण वळि मामी जी श्रीमती अरुन्धती
सेमवाल जी से या जानकारि मिलि ।

बिसर्जन से एक दिन पैलि पुत्रकामना वळि जनानि
अपणा-अपणा द्यू बाळी रातभर वे पर नजर रखदिन । सुबेर

चार बजि उठी न्हये-ध्वये जगदा द्यू अपणा डेरा लिहजे पूजा
थान मू रखदिन ।

आखिरी दिन पयां कि फौंग्यून बीं माता का हाथ-खुट्टा
बणौंदन । बीं माता अर वींकि चेली पर गौणा, नया कपड़ा
साड़ी, बिलौज अर चुन्नी पैरोंदन । चेल्या नाक पर लौंग
पैरोंदन । सोना गौणा लोग अपणा देंदन । पैलि पूजा-हवन
होंद फेर बाजा-गाजा का दगड़ा स्वस्ति वाचन करदा-करदि
बीं धारा पौँछदन । बीं को चौकलु, हर्याळी का पुड़खा,
टोखरी सब मुंड मा लिहजँदन । हर्याळिन झक्क तौं टोखर्युँकि
सोभा देखण लैक होंदि । ये मा खास ध्यान देण वळि बात या
च कि स्यळौणा वास्ता लिहजांदि दां बीं माता को मुख गौं कि
तरपां होंद । बिसर्जन का दिन बीं धारा मू बीं स्यळौण का बाद
वापस मिल्यौं गौणों तैं लोग बीं माता का परसाद रूप मा
सम्हाळी देंदन । वे दिन सब अपणा-अपणा घर बिटि छोळि
रुवट्टि, गुलगुला, स्वांळी-पकौड़ी, मरछो हलवा बणै बीं
धारा लिहजँदन फेर परसाद का रूप मा बाँटदन । हर्याळी
तोड़ी एक-दुसरा मुंड मा धरदि दां 'स्यमन्या-स्यमन्या'
बोलदन ।

लोक का यि उत्सव मेलजोल का दगड़ा हमारि आस्था
अर वि वास का प्रतीक छन । बीं माता यि जागर हमारा लोक
कि अनमोल धरोहर छन ।

□□

अन्तर्राष्ट्रीय महिला दिवस का मौका पर धाद की पढ़दरि रश्मि सती का तैयार कर्या रेखांकन धाद का पढ़दरो का वास्ता



बीं माता जागरों मा 'घुंगुरजोळु'

• प्रस्तुति : श्रीमती राधा देवशाली

[बीं माता का जागर गाणै परम्परा आज बि छ, यि जागर बीं आगण पर खूब गये जांदन, यि जागर अपणा आप मा पूरी कथा दन जो कर्खि लेखीं नि मिलदि, यि जागर गै-गै कि सूण-सूणि कि आज तक लोक मा प्रचलित छन, बीं माता को यो जागर घुंगुरजोळु देवशाल की श्रीमती राधा देवशाली का श्रीमुख बिटि सूणि कि तौंकि नौनि श्रीमती बीना बेंजवाल न ये अंक का वास्ता खासकरि संकलित करीं छ - संपादक]

घुं गुरजोळु गांदि दां कंदुड्यो मा बजण बैठदन ठुमुक-ठुमुक हिटदा बाळा भगवान कि गुंदख्याळी खुट्यो पर बजदा घुंगूर ।

बीं माता जागरों मा कथा औंदि कि सारदा बामणी अर नारद ऋषि कि कवी संतान नी छ । एक दिन द्यूराणी-ज्यठाणी वखळा मा कूटणी रौंदिन । एक लुवार्यौण घुंगुरों कि जोडी बेचणों ल्युंदि । द्यूराण-ज्यठाण मजाक उड़ौणों वीं तैं जाणि-बूझी सारदा बम्यौण मू भेजदिन । औति सारदा कि जिकुड़ि बबरै जँदि । वा अपणि सीली वबरी जैतैं बुकारुण रौंदि । व्यखुनि दां नारद ऋषि घर औंदिन । सारदा तैं रौंद देखी कारण पूछदनि । सारदा घुंगूर वळि बात बथौंदि अर बामण मू अपणा जोग का कागज दिखौणो बोलदि । नारद ऋषि भौत समझौंदन कि यीं बुढ्यांदि दां संतान कि आस करण बेकार छ । पर सारदा कि जिद का अगनै तौंकि एक नि चलदि । जोग का कागज ल्हिजै बामण मू जांदन । बामण मुंड ढगद्योंद । जागरों का अनुसार फेर सि बिधाता मू जांदन । सारदा का घर जरमणा वास्ता कवी बि बाळो नि पैटद । फुथ्यै-पथ्यै मुस्किल से एक वाळा तैयार होंद । बिधाता वेतैं समझौंदि कि सारदा त्वे उछ्याद करण नि देलि, दूद-घ्यू या बिसगौण खतण नि देलि त् तु वापस ऐजै । सारदा बामणी पौछुपा लांदि पिछनै-पिछनै जैतैं सब्बि छवीं सुणणी रँदि । बिधाता कि किरपा होंदि अर सारदा बम्यौण कि गोद भरि जँदि—

फटिंग वखळी स्या खैर्वा च गंज्याळी
निंगाळा फटगौणी निंगाळा छंटणी
सौमान्या ठकरवाणी तुम घुंगूर ल्हियाला
घुंगूर ल्यौली स्या जट्ठी ज्यठाण



द्यूराणी-ज्यठाणी दिगती लगौंदी
 दिगती लगौंदी सि चुगली सारदी
 आँखी झपज्यौंदी सि भौंऊं बबलौंदी
 सारदा बम्यौण स्या जनम कि औती
 सारदा बम्यौण स्या बुकारूण रौंदी
 सीली वबरी तिन झीली ल्हीलि खाट
 आयो नारद सु ह्यौरद-देखद
 नारद ऋषि सु परेसान हवेगी
 सारदा बम्यौण सु धीर्यौंद बुझौंद
 कीक सारदा तु परेसान हौंदी
 सारदा बम्यौण स्या बुकारूण रौंदी
 मेरा कागज बड़ा बामण दिखावा
 बाटा उठि लेगी नारद बरमा का पास
 आधा-आधा बाटा तेन बिछौणू बिछैली
 रौड़ांदु-दौड़ांदु आयी बरमा का पास
 स्वो बडु बामण पिठें माथो देंद
 दूद तमोळि सु पो द्यौंद पखळि
 क्या आयी नारद तू अन्न नौंकु भूकु
 अन्न नौंकु भूकु बस्तर नौंकु टूटु
 तब द्यौंद नारद जोग का कागज
 बोल मेरा बरमा तु सच-सच बोल
 सु बडु बामण मुंड ढगड्यौंद
 नारद ऋषि सु परेसान हवेगी

मेरा बामण मैं खौरी ऐगि असंद
 बरमा जाँद सु बिधाता का पास
 बिधाता बोलदि तुमारा मर्त्यलोक
 उछ्याद करिक सि बुरो करदा ब्योवार
 दूद तेल खौतिक बुरो करदा ब्योवार
 बिसगौण खौतिक बुरो करदा ब्योवार
 मर्त्यलोक कि माता बुरो करदि ब्योवार
 साळ बैठी ल्यौली त्वेमू नि द्यौली
 त्वे खौतण नि द्यौली तु वापस ऐ जाई
 माता डांटली तु वापस ऐ जाई
 मेरा बचन तु गाँठ बाँधी ल्हीजा
 बोला नारद क्या होये बिचार
 बड़ा बामणन क्याऊ मैंक बोली
 बालक त्वेमू दूद-तेल मांगलू
 सो ना द्ये तु वे फटगार
 सारदा बम्यौण लेगी पैलो-दूजो मास
 सारदा बम्यौण लेगी तीजो-चौथो मास
 तीजा-चौथा मास लेगी खट्टा नौंकु भौंद्या
 नारद ल्युँद निमौ-नारंगी
 आमों का बग्वान आम तोड़ी ल्युँद
 सारदा बम्यौण लेगी पाँचों-छठो मास
 सारदा बम्यौण लेगी फूल नौंकु भौंद्या
 नारद जाँद फूलों का बग्वान

चैत अर चैती

नारद ल्युँद गुलाब का फूल
गुलाब का फूल रैबेली का फूल
सारदा लेगी सु फल नौकु भौँदया
नारद जाँद केका का केळा का केळाण
नारद ल्युँद केळा का हतरा
सारदा लेगी सातों-आठों मास
दिखेण लगीगे लटग्याळो पैर
सारदा बम्यौण हवेग्या नौ-दस मास
सारदा तें हवेग्या सि पूरा दस मास
सारदा तें लेगी स्या अंग नौ कि पिड़ा
गण्यौण लगिन सि त् सर्गे कि गैणी
सर्गे कि गैणी काकरे कि बाँसी
बुलौण लगिन सि त् सोडु-वोडु दाई
सारदा कु हवेगि सु त् बाळो भगवान
बढ़ाई बजौँदा बाजा-गाजा ऐग्याँ
बुलौण लगिन सि त् औजी नौ को बेटा
औजी नौ को बेटा बढ़ाई बजौँद

बुलौण लगिन सि त् ते बड़ा बामण
सु बडु बामण अस्लोक बोलद
अस्लोक बोलद मंगल गांद
तब रे बुलौँदा सि त् सोनली लुवारी
सौमान्या ठकरवाणी सौमान्या ठकरवाणी
में छौँऊँ ठकरवाणी बचन को बंदी
मेरो बचन त्वे सरपोळो हवेगे
मेरी घुंगूर जोड़ी त्वे जसिली हवेगी
त्वे द्यूलू लुवार्यौण मैं डाल्यून त्यवार
डाल्यून त्यवार सुप्यून डडवार
बढ़ाई बजौँद सु औजी को बेटा
मंगल गांद सु बामण को बेटा
नागोरी मांग स्या सभा हि बैठीग्ये
सभा हि बैठीग्ये मिठाई बाँटीग्ये
सि नागोरी का लोग बधाई रे देंदा
पंचनाम द्यो सि बधाई रे देंदा ।

ग्राम-देवशाल वाया-गुप्तकाशी, रुद्रप्रयाग

चैत मैना में द्वफरा मा गयेण वळो चैती नृत्य गीत

दान्युं मा को दानी
स्थाई चरण - इजू ! छयो दान्युं मांग को दानी
सूरिजा बंशी राजा हरीचंदा जी.....
सहायक चरण - जैका छया सूना का छतर
छया वैका चांदी का पतर जी इजू !
छयो दान्युं मांग को दानी
जैका छया मोत्युं का ख्लाण
छया जैका हीरों का डिसाण जी इजू !
छयो दान्युं मांग को दानी
जैका पास छई नौऊ निधि
चरणू मो जैकी अष्ट सिद्धि जी इजू !
छयो दान्युं मांग को दानी
छयो जै को पराणी उमैलो
आज वैको सरैला धुमैलो जी इजू !

छयो दान्युं मांग को दानी
छयो जै को पराणी उमैलो
आज वैको सरैला धुमैलो जी इजू !
छयो दान्युं मांग को दानी
बलूरी आज वै की छन फैली
धुंवां ला आँखो वे की मैली जी इजू !
छयो दान्युं मांग को दानी
विधना की कनी या ठकुरी
राजा लायो ध्यूरा की चाकरी इजू !
छयो दान्युं मांग को दानी
दान्युं मा को दानी
इजू ! छयो दान्युं मांग को दानी
इजू ! छयो दान्युं मांग को दानी

• केशव अनुरागी

गीत मूल स्रोत्र : नाद नंदनी

फ्यूँळि कि गाथा

• प्रस्तुति : नीरू कण्डारी

चैत का मैना डांडी काठियों मा बानि-बानि का फूल खिल्यां रै दिन, बण मा वुंराशी का फूल अर डोखरा पुगड़ों का भीटा पाखों का फ्यूँळि का पिंगला फूल फ्यूँळि का फूल से हमारा जनमानस मा एक कथा जुड़ी चा फ्यूँळि का फूल से एक अमर प्रेम की दुखान्त गाथा जुड़ी चा फ्यूँळि कभी एक ज्युंदि जागदि नायिका छै, इन बुले जांद कि फ्यूँळि को रूप रंग फ्यूँळि का फूल पर पड़यू छ।

चैत का मैना चैती गीतु थै लगाण वाळा वेडा, वाददी, अर औजी घौर जैकी चैती गीत लगादन, यूं गीतु मो फ्यूँळि, सरू, सदेई, जस्सी का गीत लगादन।

पाड़ की बेटी ब्यारियों को जीवन बड़ि खैरि को रै। खेती, किसानी, गाजी वाछी, सुवगर वटै रूमकि तलक काम ही काम घौर मा सासुक ककड़ट, जलतेर सोरा भारा, यी खौरि तैं और बढै देंदन। इनमा जब सैरा बण लाल बुरांश का फुलुन लकदक बण्युं हो डांडी मा बानि-बानि का फूल खिल्या हों, मैत की भारी खुद लगदी, ये ही वास्ता चैत का मैना धि याणियों तै तैत भेजण क रिवाज छ।

बिजी गैन बीजी पयाल वासुकी,
बिजी गैन बिजी खोली का गणेश,
बिजी गैन बिजी दवतो का थान,
बिजी गैन बिजी दिन को सुरजि,
बिजी गैन बिजी फ्यूँळी स्या रैंतेळि,
रेणी रातु ब्याणी गैण्यो लागि घाम,
तब फ्यूँळि की रौल पूरब का छाजा,
कनि धवाड़ी लगोन्दी.....
लुकारी ब्यारी सूतो जल लैन,
हमारी ब्यारी की अजों निदंरा नि खुलै,
कनकें बिजाळलु वीं कि निदंरा.....
मैं झकोली कि बिजाललु त फ्यूँळि छळोयि जाली,

मैं अकोलीक बिजाललु त फ्यूंळि तोई सारी जालो,
सतजुग मां सोतो नी बिजाळणु
खांदो नी हितराउणों,
तब रौळ न हाथ धरे शतमुखी शंख,
शंख का शब्द न फ्यूंळि बिजी गयाये,
चचलैक उटै फ्यूंळि भिभडै कि बैठि,
ओल्यो पल्यो द्वारा खोलदी घाम लै ग्ये,
पैरे तैन मखमल की जांगी,
लौलेंदी घाघरी सुवापंखी साड़ी घरे कांगी गाडे ऐना,
तब वीणाई खोलदइे फ्यूंळि सौणी सी सुरीज,
स्यूंदी पाटी गाडदी वा धौळि जतो फाट,
तैं का मुख मा सुरीज पीठी मां चंदा,
हाथु मा स्या नि लियेन्दी, भयां स्या नि धरेन्दी,
वीं का रंग मा घुमेलो होन्दो सुरीज,
वीं की मुखड़ी बुरांसी लांदी रीस,
नाकड़ी तड़तड़ी वीं की खड़ी धार सी पौंडी,
आंठड़ी दिखंन्दि दाळिय फूल सि वीं कि,
दांतुड़ि दिखेन्दि वीं कि केळ सि गेळ,
तब लै कि पैरीक वा रौळ का पास जान्दी,
दे दयावा रौळ जी मैं मैत जाण को हुकुम,
दिन राति को मेरी ब्वारी तेरो कनो मैत होलो,
भात की पाथली तू उबाण नि देन्दी,
डोलेरू की कांद तू स्यळण नि देन्दी,
गति की कापड़ी मू फ़ैलेण नि देन्दी,
मैत को कलेऊ मू बाटेंण नि देन्दी,
पाणी को नौ नी छ बुंदु मेरी ब्वारी,
जा मेरी ब्वारी तु पैली पाणी को जा,
एक हाथ धरदि फ्यूंळि तांमा की गडुळि,
तब जांदि फ्यूंळि पूरब का ले द्वार,
चला चला दगड्यो बैणियो कुवां पाणि क जौंला,
वल्या-पल्या कोट को एक ही छौ पन्दियारो,
दगड्याण्यू लीकी फ्यूंळि पाणी को पैटी गै,
कुछ अगनै छाई नौनी कुछ छाई पिछनै,
बीच मा दिखेन्दी फ्यूंळि आंछाड जनी,
ढिस्वाळ चलदि त विड्वाळ छ ढळकदी,
लुकारी ब्वारी रजौ..... सरासर गैन,
फ्यूंळि जांदी गुर-गुर..... दां,



हकलकदी-ढळकदी गै वा कुवां का पास,
औंय की ब्वारी पाणी भरीक घौर ऐनी,
फ्यूंळि रौतेली बैठीक छाति खुट्टी धोन्दी,
हाथ खुट्टी ध्वैकी वा कुवा छैल हेरदी,
देखदी वा पाणी मां पड्यूं छैल हँको,
एक छैल त मेरो होलो, हँको कँको होलो,
यो घुंगट्याळो छैल त मेरो होलो,
हँको फरक्याळो छैल कैको होलो,
इथें देखदि उथें देखदि फ्यूंळि रौतेली,
तब ऐंच देखदी भूपति ले रौत,
डाळी मां बैठयूं चौसारो छ गंठ्योणु,
तब मुल मुल हँसदि चुल बुल बोलांदी,
आज को चौसारों भेना मैई दे देण,
देंण त मैं दयूलू रौतेरी लाली कँका नौं,
तुम जु देला मै लौलु बुवाजी का नौं,
जो तेरो बुबा देलो लाली तेरी बोई,
आज को चौंसरो भेना मैई दे दीण,
देणा मैं दयूलु रौतेली कैका नौं,
तुम जु दियाला मैं लौलु भैजी का नौं,
तेरी भैजी देलो त तेरी बाँजी लाली
तब बोदलो भूपति आज को चौसारो त्वंक मेरी रौतेली,
पकड़ीक बोली वैन फ्यूंळि भुयां मा बैठाए,
सिलंगि कि डाळि निस फ्यूंळि छोपी लगौन्दी,

चैत अर चैती

तब भूपति फ्यूंळि निंदरा ऐ ग्यै,
जन धारू डूबे दिन गाडु पड़े छाया,
तब आये फ्यूंळि पाणि लीक घर बौड़ी
दुरु विटी देखे रौळन वीं को चौसारो,
आज को चौसारो ब्वारी त्वै कैन दिनी,
तब बोलदी फ्यूंळि बाबाजीन दिनी,
तेरो बाबा देन्दो तेरी बई लान्दी,
तेरो भैजी देन्दो त तेरी बौजी लांदी,
ऐलाई बैलाई वीन दस बार दंऊ,
तब बोली वीन भूपति न दिने स्वामी,

सूणि कै हंकार चढ़ी वे पर दूध सी उमाल
जुता को गारो स्वैणी वड़े बुरो होन्दो,
मारे लात चोट वैन, फ्यूंळि उताणि पड़दि,
फूटे कपाळ वीं को नाक डांडि टूटे,
नीला घौ पड़यां पिंगली मुखड़ी वीं की
फ्यूंळि का पौन उड़ि गयां,
चली गये रौतेली देवतौं मा समाई,
तैं कि पिंगळी मुखड़ी को रंग उड़ि कि
फुल्लु मा समाए.....!

• आम्रकुंज बुघाणी रोड श्रीनगर

राजभवन मा फूलदेई

• मनोज इष्टवाल

फूलदेई दुनियां को पैलो यनो परब च जैकि शुरुआत ननतिन करदन अर या प्राकृतिक रूप से ऋतु राज बसन्त कि शुरुआत होंद। ननतिनों को शुरु कर्यू ये पर्व को समापन एक मैना बाद बिखोति का दिन दना-सयाणा करदिन। अर बिखोत बिटि बैशाखा थौळ कौथिग शुरु हवे जादन।

चैता मैना संगरदि को फूलदेई का दिन राजभवन मा फूलदेई पर्व मनये गे जैमा महामहिम राजपाल अर मुख्यमंत्रि बि सामिल हवेनि। राजभवन मा या कि शुरुआत यूथआईकन का मुखिया शशिभूषण मैठाणी 'पारस' जी कि पिछला सालों बिटि शुरु करीं छ। फूलदेई मनागौ उंका दगड़ राजधानी का

दर्जनों स्कूलों का ननतिन बच्चा फुलकण्डि लहेकी राजभवन मा फुल ढोलणों पौंछदन वेई दिन लगद कि यो राजभवन कै हिमालयी राज को राजभवन छ।

राजभवन मा फूलदेई कि शुरुआत करण वळा मैठाणी जी बोलदन कि यु पर्व हमरी प्रकृति से जुड्युं पर्व छ अर यु पर्व प्रकृति का दगड़ हमारा समाज का सम्बन्धों कि व्याख्या करद कि हम प्रकृति से कन जुड्यां छौ ये महत्व पूर्ण पर्व



राज्य पर्व को दर्जा दिये जाण चयेणों छ। यां से नई पीढ़ी अपणी रीं अनूठी लोक परम्परा से बि जुडलि।

□□

ऋतु गीत छन अनुभूति का गीत



गिरीश सुन्दरियाल

गढ़वाळ का लोकगीतु मा यखै प्रकृति की कतगै अन्वार दिखेंदन, हमारा मुल्क मा प्रकृति पूजा मानवीकरण अर वेका प्रति आत्मीय भाव वैदिक काल बटि चल्दु आणू छ। प्रकृति अर मनिखि को छपछुपु आत्मीय सम्बन्ध अर दगड्यात् रीं मयळि धरति का कूणा-कुमच्यरौं तक दिखे सकेंद। किलैकि यखऽ मनिखि को जीवन कबि प्रकृति से अलग नि हवे सकदु। ये एक-हैका बिगरि कबि ज्यूंदा नि रै सकदा, मन यखऽ गीतु मा प्रकृति को वर्णन अफु से अलग नि लगदु प्रकृति तै यख क्वी भौतिक वस्तु नि मनेगे, बल्कि अपणु अंग अपणि कुटुमदरि मनेगे, यान प्रकृति यख गीतु को वर्णन विषय नी, आत्मिक अनुभूति छ। यांका कारण ही द्वियो मा भावात्मक समरूपता, गैरी संवदेना अर परस्पर सापेक्षता दिखेंद। रीं वजै से हमारा लोकजीवन मा कतगै पूजा पद्धति, परम्परा अर रीति-रिवाज इन छन कि जौन ऋतु बार-त्योहारों तैं जलम दे। जो प्रकृति का प्रति पूजा, प्रेम अर आत्मीय भाव व्यक्त करदन। हमारा लोक मा धरति पर उफरण वळि हर कुटमुणी, कुम्पळि अर फूल को एक त्योहार को उल्लास देंद, येसै हमारो समाज मात्र एक सामान्य जैविक क्रिया नि मानदो, बल्कि एक पर्व का रूप मा मनौद, जो कि प्रकृति का दगड़ी वेका आत्मीय सम्बन्ध तैं दर्शाद।

हमारी धरती मा ऋतुगीतु की परम्परा भौत पुरणि छ, यख तक प्राचीन संस्कृत काव्यों मा बि ऋतुगीतु बिंजा छन जो कि लोकगीतु से प्रेरित मने जांदन। ऋतुगीतु का बीज लोक की धरती मा हि औंकरदिन गढ़वाळ मा सर्वाधिक प्रचलित लोकप्रिय गीत बसन्ती (चैती) ह्युंद्या, अर चौमासा छन् किलैकि ये ऋतु मुख्य रूप से प्रकृति अर लोक का उल्लास से जुड़ी छन।

यूं मा बि बसन्त ऋतु सबसे ज्यादा महत्व रखद, गढ़वाळ मा बसन्त ऋतु मा जो गीत गये जांदन वूंमा बसन्ती, चैती, खुदेड़ अर झुमेलो विभिन्न रूपों मा व्यक्त होंदन। बसन्ती सामान्य रूप से बसन्त की शोभा का गीत

- जन्म : 9 मई, 1969
 कृतियाँ : मौल्यार (गीत संग्रह), अन्वार (कविता संग्रह), असगार अर कब खुलली रात (नाटक संग्रह)
 सम्पर्क : ग्राम चुरेड़गांव, पत्रालय जगस्याखाल, बाया चौबट्टाखाल, पौड़ी गढ़वाल

छन। प्रकृति मा डाळि-बोट्यो को हैरू-भैरू होणू फुलार बैठणू भौरा-प्वतळी को रिंगणू मनखि का जीवन की अपणि अनुभूति खिलदा फुलार अर हैसंदा मौल्यार तै नया रूप रंग मा द्यखद, यूं गीतु मा बसन्त ऋतु को बौड़णौ मौळ्यारौ आपौ अर बनि-बनि का फूलों को खिच हैसणू, मुलमुल हैसणू भौरा-प्वतळी तै रंगस्याणू उलार्यो तै उळ्याणो खुदयाणो को जिक्क मुख्य रूप से दिखेंद। यूं गीतु मा जौं फूलों को विशेष वर्णन छ वूं मा पय्यां, रैमासी, लय्यां, मेळू, ब्रहम कमल, लसर, जयाण, कमळ्या, सितराज, दळ्या, आदि उल्लेखनीय छन्, पर यूं मा बि फ्युंळि अर बुरांस सबसे अधिक लोकप्रिय छन् वो यखै प्रकृति अर वेकी सुन्दरता को प्रतिनिधित्व करदन।

फूल फूलेन अनमनि भांति मा
बाँज-बुरांस की कोंपळि मौळी
सुमाया सेलपाडो कूजों फूले
बण की सबि लगूलि फूले
फूल-फूलु मा म्वारी रूणाली
हिलांस प्यारी डाँडौ मा आली
कखि घुघुति घुरद प्यारी
जिकुड़ी मेरि झुरांद प्यारी।

इन हमारा लोक मा हजारों गीत छन् जौमा यखै प्रकृति अर वीका दगड़ि गैरी अनुभूति अर संवेदना दिखेंद। फूल यी ऋतु मा उद्दीपन को काम करदिन उन्नि यखऽ पौन-पंछी कफू-हिलांस मेल्वडि, घुघुति आदि की मयळि भौण खुदेदी पराण्युं तै मैतै खुद लगौंदि अर स्वामी की याद दिलौंदि। ये हमारा सबसे बड़ा रैबार्या बि छन। हमारा खुदेड़ गीतु मा यूकू कळकुळो वर्णन मिलद। कुल मिलै कि यखै डाळि-बौट्यी, लगुलि-पतुळि, फुल-पाती अर पौन-पंछी सब मिलै कि जै मौळ्यारै ऋतु कि शृष्टि करदन वो खुदेंदि जिकुड़ि तै हौर खुद लगांद। या खुद जिकुड़्यो मा कांडु सि बिनांद पर

फिर बि यीं पिड़ा मा भले ही उदासी पर बैर-भौ कतै नि होंदु। य हमारा पहाड़ी चरित्र की विशेषता बि छ।

हमारा घर गौं मा बसन्त पंचमी, फूल संगरांद (चैते संगरांद) विशेष प्रिय छन्, किलैकि यूं का औंदा हि बसन्त को आगमन हवे जांद, अर जगा-जगौ धार्मिक पर्व-त्योहार वीरेण लागि जांदन्, बसन्त ऋतु मा कखि मैना भर कखि हप्ताभर कखि मेष सक्रान्ति अर्थात बिखोत तक फूलदेई त्योहार मनयें जांद। यानें चैत संगरांद से लेकी बैसाखै संगराद तक गौ की छ्वटि-छ्वटि नौनी बनि-बनि फूल लैकी सबि मौ कि देळ्युं मा धरिदिन अर तौंकि सुख-समृद्धि की कामना का गीत गादन—

फूलदेई छमा देई दैणी द्वार भर भकार
फूलदेई फूल संगरांद
सुफल करो नौ बरस तुमकू
भगवान तुमारा भर्यान भकार
अन्न-धन फल्यान
चौदिशु फूल खिल्यान
दैणी हुया फूल संगरांद।

बसन्त ऋतु मा डांडा-कांठौ थड़िया-चौफला, झुमेलो आदि लोकनृत्य गीतून गुंजणा रदन्, यू गीतु मा बिं अनुभूति की हि अभिव्यक्ति प्रमुख छ। मिलन अर विछेह आशा-निराशा प्रकृति वर्णन अर रुद-खुद यू गीतु मा द्यखणौ अर सुणनौ मिल्द, ये गीत पारिवारिक सम्बन्धों की अभिव्यक्ति बि करदन, जै तैं ससुरस्य बेटी व्यक्त करदन्।

आयी बार बसन्त मैना आयो चैत को
मनखि त रया दुरु पंछि नि आयो मैत को
आयो मैना बैसाग की सुख नी छ सास
ग्युं-जौ का पूळीं निस, कमार पड़िगे झास
हिंसार को गूंदो मांजी, हिंसर को गूंदो
परदेशी मुलुक मांजी क्वी अपणो नी हूंदों।



सदेई

• तारादत्त गैरोला

सदेई चैती गायन परम्परा को अमर गीत छ यो गीत साख्यूं बिटि औजि चैती अर चैती पसारा मा गाणा रैनी अर वूकै मुख बिटि सूणी पंडित तारादत्त गैरोला जीन यो कथा गीत संकलित करि ये गीत सदेई कि भूमिका मा वूको लिख्यु कि—ये गीत हमारा देश का औजी चैत का मैना मा जब वो अपणी दिसाओं का घर मांगण जांदन तब गांदन। मैन बि यो कई बार सुणे। पूरो गीत भौत कम औजि जाणदन बहुत कुछ अपभ्रंस करी गांदन। मैन जनो सुणि छयौ वे मा बहुत कुछ परिवर्तन करण पड़े।

कवि शिरोमणी पंडित तारादत्त गैरोला जी को संकलित कैरी लिख्यूं यो कथा गीत इतिहार कार शिवप्रसाद डबराल 'चारण' जी का सम्पादन मा **सदेई : जाग्रत स्वप्न** पुस्तक बिटि पूरो गीत ये चैती अंक मा धाद का पढदरौं का वास्ता साभार : सम्पादक।

(1)

सदेई की छे जनि मैत डाळी,
बिस्रौण कू तै खुद तैं न तन्ने।
सिलंग डाळी ससुराड़ि लाई,
चमोला' की सुन्दर चौंरि मांजे!! 1!!

दुपत्ति होई, चउपत्ति होई,
हाथू कि बेतू कि त डाळि ह्वे।
औरू कि वर्षू बढदेन जनी,
सैदी कि डाळी बढदे दिनु मां!! 2!!

गईन फाटी अब चार सांई,
चारौं दिशौं मां त गयेन फैली।
फांगे व पत्ते भि त खूब घऽणी,
आयेन सांयो पर डाळि वीं की!! 3!!

गुटमुट बड़ी छत्रि सि गोळ डाळी,
छया घणी स्या भलि देण लैगे।
चौंरी घस्यार्यौं कि बिसौण होली,
तैं डाळि मां होलो चड़ों को बासो!! 4!!

क्या खूब स्वाणी कनि डाळि प्यारी,
तैं चौरि मांजे कनि देंद शोभा।
दोफरी का घामऽत थक्यां बटोई,
निस डाळि बैठी देला आसीस!! 5!!

(2)

जाड़ो नसीगे प्रकृती बिजीगे,
पशू व पंछी सभि जी गयेन।
जाड़ा न जो सुन्न त होइ गैतो,
स्यो बौड़िगे ल्वै-रस-सार प्राण!! 1!!

डाळी व बोटी बण वो बणोंडी,
निर्लज्ज जाड़ा न करेति नांगी।
अनेक पैर्यालन ऊं न रंग की,
बसंत का स्वागत कू त साड़ी!! 2!!

गाड ऽ गधेरा अर पंछि पौन,
छया जो जाड़ा न सुन्न होयां।
कर्ण ऽ से कोलाहल लागि गैन,
खुशी बसन्त ऽ कि मनौण लैन।। 3।।

चीरो कळेजा पहुचौण्या वायू,
स्या धैंत स्वाणी अब लागदे छ।
सुगन्ध फूलू दगड़े मिली क,
अमृत पिलाई पुलकौंद पौन।। 4।।

सफेद रत्ता पिंगला व नीला,
भांती व भांती छन फूल फूल्यां।
सभी न यूँ न ऽ प्रकृति पुरुष की,
सजाइ दीने रति-रंग-भूमी।। 5।।

कुलूड़ी भि फूली अर फ्युंळि फूली,
गयेन फूली बण वो बणोंडी।
गुलाब फूल्यो अर कूँजो फूल्यो,
फूली गयेन लगुले व झाड़ी।। 6।।

आरू घिंघारू अर आम डाके,
निम्बू नरंगी भि त फूलि गैन।
चम्पा भि जाई भि चमेलि फूली,
बुरांस धारू मंज ऊंचि फूल्यो।। 7।।

सिलंग फूली सब तौर फूली,
गईन फूटी कलि कोंपले भी।
क्या घऽर क्या बऽण सभि जगौं मां,
सिलंग की बास सुबास फैली।। 8।।

छन रंग नाना, अर रूप नाना,
सुबास नाना अर गीत नाना।
अनेक नाना विधि का त स्ये तऽ,
दिखेंद, सूँघेंद, सुणेंद, जां तां।। 9।।

गीतू सुरीला छन पंछि गाणा,
वी कोकिला की पर प्यारी कू कू।
सुणेंद चारू दिशि दूरू दूरू,
दुखौंद ज्यू कू सहदेइ का छ।। 10।।

पंछी त गाला छइ मास और,
चेड़ो कफू बासलो चैत मास।
सिलंग डाली पर फ्युंळि गाली,
ना बास के कू जिकुड़ी झुरौंदी।। 11।।

हल्या रयों मां छन मस्त रौंक्णा,
पाख्यों घस्यारे छन गीत गाणी।
लगाइ भौणे छन गीतु मांजे,
सवालू जबाबू दुहरौण लागीं।। 12।।

रै वार रै पार हिलांस प्यारी,
कू कू करी कूकद लंबि कू कू।
झपन्याळि गैरी छ गदेऽरियों मां,
स्या म्योलड़ी भी कना गीत गाणी।। 13।।

भौरा छया जो सुनसान ब्याके,
स्ये आज फूलू फुलु मांत गुंजणा।
ये फूल की केशर फूल वै मां,
लिजाण लाग्यां छन स्वार्थि भौरा।। 14।।

इनी निराली अर भांति भांत्युं,
छ काम होणू प्रकृति-पुरुष को।
सृष्टी छ सारी उत्सौ मनौणी,
खुशी मनौणी खिल खिल हंसणी।। 15।।

बसन्त ये मां रज-तात-बात,
आयूँ छ गर्भाशय बीजु माँजे।
जण्ण ऽ कु जन्तू जननी जनक को,
छ जज्ञ जोड़यूँ जग मांज जा तां।। 16।।

सिलंग नीस ऽ सहदेइ बैठीं,
सुण्णी छदेख्णी छबण की बहार।
तैं मैति डाळी मुँ सदानि औंदे,
खुदेइ सैदी खुद बीसरौण।। 17।।



सैदी कु औंदे जब याद मैते,
दगडू याणियों की भि छ याद औंद।
बणूँ बणोंडो कि भि याद औंद,
धारू व गाडू कि भि याद औंद॥ 18॥

चौरी मां बैठीं च खुदेड सैदी,
बौळी सि होई खुद ते सदेई।
रोंदो बरांदो गये पास मां का,
चिड़ी सि रीटी भरि ज्यू स्या रोंदे,
इना इना बैन मुबैन बौदे॥ 19॥

“हे ऊँचि डांड्योँ तुम नीसि जावा,
घणी कुलायोँ तुम छाँटि होवा।
मै कू लर्गी छ खुद मैतुड़ा की,
बाबा जि को देखण देश देवा॥ 20॥

मैत ऽ कि मेरी तु त पौन प्यारि,
सुणौ तु रैबार त मां को मेरी।
गाडू गदऽन्यू व हिलांस कप्फू,
मैत ऽ को मेरा तुम गीत गावा॥ 21॥

बार ऽ ऋतू बौडलि बार मास,
आली व जाली जनु दांइ फेरो।
आई नि आई निरभाग में कू,
क्वी भी नि आई ऋतु मेरि दां त॥ 22॥

मैत्योँ कि भेजी कपडों गीत गाली,
गला लगाली खुद बीसराली॥ 23॥

मैत्योँ कि भेजी कपडों की छल,
पैली दिखाली कनु से मिजाज।
लट्याळि मेरो कुइ भाइ होंदो,
कलेऊ लौंदो व दुरोंदो पैणा॥ 24॥

लट्याळि होलो निरभाग मेरो,
पीठि नि क्वी होयन भाइ बैणा।
करी पिछिण्डी छऊं धौली पार,
गाऊँ विदेशी अर दूर देश॥ 25॥

जवान ह्यैग्युँ लड़क्वाल्लि भी ग्युँ,
मेरी करे कै न खबर न सार।
मैत ऽ कि देवी छइ झालीमाली,
मेरी सुणीयाल बिपत्ति भारी॥ 26॥

दीयाल में कू इक भाइ प्यारों,
देखी क जै कू खुद बीसरौँ मैं।
भाई कि मुखड़ी जब देखि लौंदो,
होंदो सुफल जीवन यो त मेरो॥ 27॥

मैं कू त नी छ कुछ और इच्छा,
समान भाई नि छ और क्वी भी।
देली तु जो यो बर आज मैं कू,
मैं देंउलो त्वै सरवस्व देवी॥ 28॥

जो भाइ होलो अठवाड़ चूँलो,
पंडों नचौँलो अर जात चूँलो।
खोंदू अभी नीतर प्राण अप्णो,
सहाय ह्यैजा दुरगा भवानी”॥ 29॥

चैत अर चैती

देवी भवानी, जननी जगत की,
प्रसन्न होंदे बर तैं कु देंदे ।
“होलो सदेऊ इक भाइ तेरो,
बड़ो प्रतापी मिललो वो त्वै कू” ॥ 30 ॥

अकाशवाणी इनि वीं न सूणे,
“सुप्नो छ यो या भरमौणू क्वी मैं ?
या मेरी होली कुल इष्ट देवी”,
दन्दोळ नाना विधि कर्दि मन्मा ॥ 31 ॥

गई सदेइ जब सांझ होये,
सिलंग डाली सणि भेंटि डेरा,
धर्दी छ वा धीरज, शान्त होंदी,
लगदी छ धन्दों पर स्यात घर्का ॥ 32 ॥

(3)

जन्मी गये मैत सदी को भाई,
होई खुशी गे अति मैत वीं का ।
माता सदी की उत्छौ मनौंदे,
पंडों नचौंदे अठवाड़ कर्दे ॥ 1 ॥

लगौंदन ऽ मांगलू गौं कि नौंने,
वो वेद वर्मा कुँडली लगौंद ।
“होलो प्रतापी यो पुत्र तेरो”
सदेउ वैको छ वो नाम धर्द ॥ 2 ॥

वर्षू जना औरू का नौना बढला,
सदेउ बढलो दिनु मासु मांझ ।
बार ऽ बरष को जब सैदु होयो,
शेरू व मिर्गू सणि मारि लौंद ॥ 3 ॥

वो खेल नाना विधि का छ कर्द,
पंडों का नाच ऽ व अंवाळे कर्द ।
लौंदो छ जीता स्यो बाघु बाँधी,
होलो बड़ो वीर त बालो सैदू ॥ 4 ॥

औंदन औरू कि त बैणे मैत,
भेटेलि बैणे दीदा भुलों से ।
कलेउ लाली अर बांटली भी,
सैदू का नी न कुइ भाइ बैणा ॥ 5 ॥

देखी क तौंकू त उदास होंद,
सदेउ वीर ऽ इना बैन बोद ।
“बैणी जो होंदी त कलेउ लौंदी,
मैतूड़ा औन्दी जनि और ऐने ॥ 6 ॥

भाग्यान होला छन जौं कि बैणी,
निर्भाग छौं मैं नि छ जै कि बैण ।
किलाइ माता नि छ बैण मेरी ?”
सुणी क माता जिउ रोकि बोदे ॥ 7 ॥

“मेरा सदेऊ तु भकाइ कै न ?
क्या कर्दि बैणी कि त बात पूछी ?
होंदी जो बैण ऽ त स्या मैत औंदी,
नादान छै तू त बुबा सदेऊ” ॥ 8 ॥

स्वप्नो इनो रात सदेउ होंद,
सिलंग डाली इक द्यौलि पार ।
सुगन्ध स्वाणी घणि गुटमुटी सी,
बैठी छ डाळी निस एक नौनी ॥ 9 ॥

सदेउ का गांव जथें च देखणी,
अती खुदेणी छ, छ और रोणी ।
नौना त बैठ्यां दुइ पास तैं का,
अंदार तौं की भि छ सैदु की सी ॥ 10 ॥

सैदू बिजोगे अर देखण लैगे,
इथें उथें खोजण बैण अपणी ।
“स्या बैण मेरी त अवश्य होली,
बिजी किलाई, हत ! नौंद मेरी ? ॥ 11 ॥

कनाइ जौलो गउं बैणी का मैं ?
मैं मैत बैणी कु कनाइ लौलो ?”
बौळ्यै सि ह्वै क इन बैन बोद ॥ 12 ॥

“बैणी को गाऊं बतलौ तु माता,
जाई क बैणी कु त मैत लौलो ।
देखी छ मै न ऽ सुपिना मां रात ऽ,
रोणी बराणी अर कोसणी छ ॥ 13 ॥

माता दिदी मेरि अवश्य स्या छ,
बतौ तु कर्लो नित अन्न सन्न ।
फाँसी लगौलो विष खाइ मर्लो,
बैणी की मैं खोज अवश्य जौलो” ॥ 14 ॥

सदेइ की याद त मां कु औंदे,
उम्ड़ी गये मोह ममत्व वीं को ।
“छै कोखि पैली जनमी सदेई,
बड़ी ख ऽ री खाइक लाड़ि पाली ॥ 15 ॥

कठिण् छ बाटो वख दूर देश,
डांडा व कांठा त अकाश पौछ्यां।
भंगार डांडा छन भारि भारी,
बाटो न पैडा नि छ बस्ति क्वी भी ॥ 16 ॥

छाला गधेरा पहुंच्या पताळ,
गैरी छ गंगा अर गाड गद्रा।
कठैतु का गाउं चुला कटूड़,
बिबैति जब से कनि स्या छक्या छ? ॥ 17 ॥

प्यारी सदेई नि बुलाई मैत,
बर्ची च वा या मरिगे नि सूणी।
खबर नि सार ऽ वख दूर देश।
सांसो नि कर्दो वख जाण को क्वी ॥ 18 ॥

वियोग प्यारी सहदेइ को त,
कठोर छाती करि सारे में न।
बड़ी ख ऽ री खाइ क पुत्र पैतो,
हा दैब ! यो भी अब तू नि रखदो ॥ 19 ॥

सदेउ मेरा छइ तू अदान,
कनाइ जैलो तख धौळि पार?
झाड़े बणाई घन घोर घ ऽ णे,
स्यू बाघ भालू छन जां डुकर्ना ॥ 20 ॥

वे दूर को त्वे रसता बतालौ?
कू भालु बाघु सिउ से बचालो?
त्वै भूक मेरा लगली सदेऊ,
हे बाबु, खाणो तख त्वै को देलो? ॥ 21 ॥

बिलाप कर्दे धड़केंद छाती,
औंदे जिऊ मां तब सोच तै का।
“होलो सदेऊ भड़ वीर भारी,
हे झालिमाली करि तै कि रक्षा” ॥ 22 ॥

“आंखी त माता रसता बताली,
जांघा तराली नदि और नाळा।
भुजा ये मेरी सिउ बाघ माली,
देवी बचाली मई झालि माली ॥ 23 ॥

पकैदे माता तु कलेउ में कू,
ब ऽ रो धरीदे तु त बोइ में कू।
माता तु बैणी कु पकैदे मेरी,
स्वाळा पकोड़ा अर रोट आर्सा ॥ 24 ॥

बणों तु माता बहिणी कु मेरी,
टाल्खी व आंग्डी अर घाघरी भी।
बैणी कु झूलो अपणी त मैत्या,
कलेउ कंडी कपड़ो कि छाल” ॥ 25 ॥

सैदू न पैर्यो भड़वालि जामो,
बांधी कमर मां तलवार अपणी।
धर्याले तै न अलगोजा मोछंग्,
देखेंद सैदू रण बांकुरो सी ॥ 26 ॥

बांसूळि मोछंग् त बजौंद सैदू,
देखेंद सैदू कनो बांको खस्या।
देखी भलो स्यो रंग रूप अप्णो,
नाच्यो सदेउ जनु मोर बण् मां ॥ 27 ॥

टेकी क माथौ चरणु मां मां का,
ध्याई हदै मां कुल इष्टदेवी।
वै राइ काला बिटि सैदु पैट्यो,
मनौण मां भी लगे झालिमाली ॥ 28 ॥

(4)

साम्णे छ वेका घनघोर बऽण,
लग्ले व झाड़ि घनघोर घऽणी।
घऽणी अन्धेरी छन बीच जाँ का,
सुई छिरकदी नि छिरकदो घाम ॥ 1 ॥

सैदू को सांसो अर इष्ट वेको,
बतौंद पैंडो व लिजांद वै कू।
तै कू तरौं ऽ द नदि और लाला,
डांडा व कांठा भि लंघौद वै कू ॥ 2 ॥

पौछीगें सैदू घन घोर बऽण,
घुर्णा छया स्यू जख बाघ भालू।
किर्णऽसूरज् की जख नी छिरकदी,
नी देंदि बाटो लगुले व झाड़े ॥ 3 ॥

तौं भालु शेरू कु भगै क मारी,
झाड़्यो लगूल्यो बिच छिर्कि छर्की।
बढ्यो अगाड़ी रसता लगै की,
गंगाड पौछयो सहदेउ भऽड ॥ 4 ॥

क्या खूब रै छ दुइ धारू बीच,
हर्यां भर्यां खेतु न देणि शोभा।
क्या फूल फूल्यां छन भांति भांति,
सुगन्ध जाँ की अति दूर फैली ॥ 5 ॥



भौरा भि गुँजणां छन फूलू फूलू,
पंछी त बासणा जख डाळि डाळ्यो।
हळ्या रयो मां छन गीत गाणां,
पूजा छ होणी तख मन्दिरू मां ॥ 6 ॥

राजा व राणी महली मुसद्दी,
विशाल कोठ्यो व कचेरियो मां।
हाथी व घोड़ा पल्टन रिसाला,
तख दौड़णा छन परेट कर्ना ॥ 7 ॥

जोगी व जंगम छन वेष धारी,
होला तहां बामण वेद-पाठी।
चोरो उचक्का छन गांठ-कट्टा,
होंदान फूलू बिच ज्यो कि कांटा ॥ 8 ॥

बागो बगीचा बगवान भारी,
फूलू फलू ते छन जक्क होयां।
बाजार चौपड़ को छ दूर फैल्यो,
व्यौपार नाना विध जां छ होणू ॥ 9 ॥

गंगा जि का तीर सदेउ जांद,
देखी क शोभा परसन्न हांद।
गंगा की धारा कनि छ ऽ दिखेंदे,
हरी रई मां जनु नीलो गोटा ॥ 10 ॥

बैठ्यां मठों मां छन तीर तैंका,
साधु व जोगी हरि नाम जपणां।
संसार की ऊ सब मोह माया,
त्यागी क लौ ईश्वर मां लगौणां ॥ 11 ॥

गंगा कि धारा कनि वा पवित्र,
साधू जनु कू कनि शान्ति दें दे।
दें दे सबू कू कनि भुक्ति मुक्ति,
तरोंद संसार समुद्र से भी ॥ 12 ॥

सैदू का मन मां तब भक्ति होंदे,
लीला इनी देखि क जाहनवी की।
द्वी हाथ जोड़ी क खड़ो उ होंद,
स्तुती इनी भागिरथी कि कर्द ॥ 13 ॥

“तुम्हारी धारा स्या कनि छ जननी हे अति भली,
जई का दर्शन ते मिटदन हमारा दुःख सभी।
मुनी वो महात्मा भजदन सदाने तुम सणी,
कनी तू हे गंगे, हरदि तरुं का ताप सब ही ॥ 14 ॥

तुमी कू हे माता, तप करि क लैतो स्वरग ते,
भगीर ऽ थ ऽ राजा पितर अपणा तारण कु थैं।
छुटी धारा तेरी शिव जि कि जटा ते निरमल,
पहाडू पाहाडू बिच धसि क आई रथ पिछै ॥ 15 ॥

दिनेती मू घूटी चलदि पथ मां जहनु ऋषि न,
पती नागू को त्वै यमपुरि कु ली बासुकि गये।
महा भारी भक्ती नृप न तबी तेरि करि छई,
प्रसन्न तुष्टा है तब दरश दीन्यो भगत कू ॥ 16 ॥

पहुंचाया सीधा तब पितर वे का स्वरग कू,
छई देंदी गंगे पतितु कु मुगती पाप हरणी।
छ मैमा तेरी भी अनुपम बड़ी ख्यात जग मां,
रंदी मू हे गंगे नित हि शिर माथे शिवजि का ॥ 17 ॥

लगैदे मां मेरी डुबदि नौका पार जलदी,
छऊं तेरा शर्णागत अधम पापी अति बुरो।
तु दे माता तारी विपद-दुख-रूपी भंवर से,
मिलाई दे मैं कू सदेइ दिदि मेरी भगवती”।। 18।।

होई गे माता वइ ते प्रसन्न,
दीयाले वे कू तब दर्श अपणो।
तरौंदि वै कू तब पार गंगा,
गंगा तरी स्यो बड़लो अगाड़ी।। 19।।

डांडो लगी गे अब एक भारी,
“डांडा कि ये मी चढ़लो चुळंखी।
क्या छऽ कनू छऽ यइ डांडा पार,”
बोल्यो लग्यो वो चढ़णऽ उकाळ।। 20।।

सदेउ पौंछीगे चुळंखि मांझ,
आइ गयो स्यो त पँवाळि कांठा।
बैठी क सैदू इक डाळि नीसऽ,
शोभा लगी गे तख की त देखण।। 21।।

छ येक मैदान त दूर फैल्यूँ,
बुग्याळ बोदा छन लोग जै कू।
अनेक रंग का तख फूल फूल्यां,
सुगन्ध जौं की भि छ दूर फैली।। 22।।

जड़ी व बूटी छन भांति भांति,
पशु व पंछी छन भौत रंग का।
कस्तूरिया, थार, बरड़, मुनाल,
निर्द्वन्द होला से तहां विचर्णा।। 23।।

फूलू व पत्योँ न रंग रंग की,
सर्जी छ मैफिल प्रकृति-पुरुष की।
पालो व धारा छन जो जम्यां तां,
छन जग्मगाणा किय्योँ सुरज की।। 24।।

नीला चंदोया न ढर्की छ मैफिल्,
खम्बा फटिक् का छन स्वर्ग पौछ्यां।
चद्दर बिछाई छन रंग रंग की,
फूलू व पत्योँ कि त दैवि तै मां।। 25।।

गंगा कि धारा अर पंछि पौन,
अद्भुत सुरीला छन गीता गाणा।
आकाश से होणि छ पुष्प वृष्टी,
गन्धर्व वो देव छन नाच करणा।। 26।।

साम्णे छ वां का थुपड़ो सपेद,
वर्षू को अस्सी जनु होलो बुड्या।
शिर से छ फूल्यूँ अर पैर तक स्यो,
सपेद चिट्टी छ जटा लटक्णी।। 27।।

गंगा कि धारा छ जटा मां नीली,
सुपेद साफा जनु नीलो गोट्टा।
नन्दा छ बैठीं जंघा मां तैका,
देखैणि लीला शिव कू रिझौणी।। 28।।

त्रिशूल डौंरू छन हाथ शिव का,
गला मां वे का छन रूंडमाला।
छन तीन आँखा अर चन्द्र माथा,
भुजंग लिपट्यां छन चारू ओर।। 29।।

ब्राह्मा व विष्णू अर यक्ष किन्नर,
स्तुती सभी से शिव की त कर्ना।
सदेउ देखी क अनूप दृश्य,
भैतीय होंदऽ अर कांपदो छ।। 30।।

आंखा बुजीक क दुई हाथ जोड़ी,
“जय हो तुम्हारी, जय त्राहि त्राहि!”
डरी मरी क अर माथो टेकि,
आगे बढू यो फेर सदैऊ वी।। 31।।

अनेक डांडा अर कांठा ह्वै क,
महा भयानक गदरा टपी का।
बणू वो बणोंडा लंघि भारि भारी,
भालू व बाघू कु मारी भगै क।। 32।।

(5)

चूला-कटूड़ऽ तब सैदु पौछयो,
चौंरी चमोला कु त जाइ लाग्यो।
बैठी गयो स्यो तइं चौंरि मांजे,
दीदी को गांऊं अर देखण लैगे।। 1।।

“औ भैर मेरी बउ! तू सदेई,
चौंरी चमोला मां हपार देख।
चौंरि मां देखऽ तु भाइ अपणो,
तेरी जनी सूरत मूर्त वै की”।। 2।।

सूणी सदेई तब रोण लैगे,
“किलै तु ननदी! जिकुड़ी झुरौंदी?”
भाई को सूणी क त नाऊं सैदी,
बौलि सि होइ भरि नैन रोंदरे।। 3।।

तसी सदेई डिट मोड़ि देंदे,
 देखेंद वी को हि सि स्यो च भाई।
 देखी क होई तब स्या प्रसन्न,
 कर्दी छ सुमरण निज इष्ट को भी ॥ 4 ॥

बिछौंद बाटा दरि वो गलीचा,
 लीगीगे आदर कु दमांड ढोल।
 दीदी का डेरा सहदेउ आये,
 सैदी लगे भेंटण भाई अप्णो ॥ 5 ॥

दण म ऽ ण रौंदे अर भुक्कि लेंदे,
 परीक्रमा भी सहदू कि कर्दे।
 कर्दी छ स्या आरति पांव धोई,
 पिठाई माथा पर स्या लगौंदे ॥ 6 ॥

बैठौंदि पांखड़ी पकड़ी पलंग मां,
 माता कि धै मैत कि बात पुछ्दी।
 सदेउ भी मैत कि बात लांद,
 सुणी क दीदी प्ररसन्न होंदे ॥ 7 ॥

“दीदी तु ऐती सुपिना मां मेरा,
 प्रत्यक्ष देखू तब चाह होये।
 उठैन भारी दिदि कष्ट में ना,
 हूँ लालसा आज छ पूरी मेरी ॥ 8 ॥

नी रै छ इच्छा अब क्वी भि मेरी,
 हूँगेन दर्शन अब दीदी तेरा।
 लाई छत्तै कू दिदि आंगड़ि टाल्खी,
 दिनी छ मां की, खुद यां ते बिस्रौँ” ॥ 9 ॥

देखी क सैदू होंदि गद् गद्,
 मैत ऽ कि वै से सुणि बात रीत।
 बुलोंदि सैदी उम्रा व सुम्रा,
 नौनों कु अप्णा सणि भेंटण मामा ॥ 10 ॥

पंडौ नचौंदे अठवाड़ कर्दे,
 देवी भवानी को भि जज्ञ ठर्दे।
 बागी व बाखरा कुकड़ो भुजेलो,
 कर्दी च स्या अष्टबली इकट्ठा ॥ 11 ॥

“चैदी छ सैदी नर की बली में,
 तुसदो नि मैं बागि व बाखरों ते।
 द्वी पुत्र तेरा छन उम्रा सुम्रा,
 ऊं की बली दे तब मान लो मैं ॥ 12 ॥

या सैदु भाई भड़ जो छ तेरो,
 वे की बली दे रख तू प्रतिज्ञ।”
 आकाश-बाणी इनि वीं न सूणी,
 सैदी कु बाणी सुणि औंद मुर्छा ॥ 13 ॥

सदेई कू तै जब होश औंदे,
 विलाप कर्दे तब स्या इनो छ।
 “हा देव! आई कनि या विपत्ति,
 लट्यालि मेरो कनु भाग फूट्यो ॥ 14 ॥

भाई चढ़ौदूँ त च गीत हत्या,
 होंदी सुतू से अर कोख सूनी।
 धिक्कार मैं कू, जनम ऽ कु मेरा,
 कभी भी होयो सुख नी छ मैं कू ॥ 15 ॥

बोले तभी यो छ महा जनू न,
 कभी भि कै कू सुख नी छ जग् मां।
 वस्तू सभी जो सुख की गणेंदी,
 दुख देण वाली छन से सभी ही ॥ 16 ॥

संसार स्वप्नो इनु मैं न सूणे।
 स्वप्नो बड़ो स्यो दुखदाई होलो।
 ज्यू ण ऽ कि इच्छा अब नी छ मैं कू,
 मरी क होला सब दुःख दूर ॥ 17 ॥

बैकुंठ जौलो मरि जो मि जौलो,
 पुत्रू व भाई अप्णों का साम्णे।
 चढ़ौंदु माता, अपणी बली में,
 प्रसन्न हूँ जा अर तुष्ट हूँ जा ॥ 18 ॥

“नारी नि चढ़दि बलि जज्ञ मोझे,
 निषेध यां को भि छ शास्त्रु मांझ।
 बली त चैंदी नर की सदेई,
 झट पट् चढौ तू व निभौ प्रतिज्ञ ॥ 19 ॥

राजा हरिश्चन्द्र दधीचि आदी,
 होया अनेकों जग वीर दानी।
 सीता सवित्री छन वीर कन्या,
 छ सत्त जौं को जग मां प्रसिद्ध ॥ 20 ॥

शरीर मन छ ऽ सुख दुःख को हेतु,
 नी छ ऽ मू ये, छइ मू अम ऽ र।
 न शस्त्र त्वै कु छन छेदि सकदा,
 न अग्नि त्वै कू सकदे जलाई ॥ 21 ॥

न आंधि त्वै कू सकदे उड़ाई,
न वृष्टि त्वै कू सकदे गलाई
न मार्दो क्वी कै न बचौंदा क्वी कै,
छ योग माया सब कर्म कर्णी ॥ 22 ॥

तू राजकनया छइ व्रत धारी,
स्व धर्म रक्षा हि छ कृत्य तेरो।
यो सार गीता उपनीषदू को,
यो ही भर्युं छ उपदेश तौ मां ॥ 23 ॥

साक्षात् देवी मुख से सुणी क,
आदेश यो वीं तब ज्ञान होयो।
कर्याले तै न स्थिर चित्त अप्णो,
कर्याले तै न स्थिर चित्त अप्णो,
घर्याले ध्यान ऽ निज इष्ट को भी ॥ 24 ॥

“आतिथ्य पूजा छ त धर्म श्रेष्ठ,
महत्व भाइ को भि होंद भारी।
मैं द्यूलो माता निज पुत्र त्वै कू,
सन्तुष्ट हो तू जननी जगत की ॥ 25 ॥

करी दिने पत्थर को कलेजो,
नोंनो कु कोठा पर लीगे स्या त।
तौं का लगीगे कपड़ा उतार्न,
हाथू कि धाग्ली व गला कि हंस्ली ॥ 26 ॥

“किलै तु मां गाड़दि धाग्लि हमारी?
मांगा बणौंदी तु किलाइ माता?”
“बेटों तुमारो यख आयुं मांमा,
तूमू नया स्यो पहिरालो कपड़ा ॥ 27 ॥

ली हाथ याले तलवार खांडो,
“तलवार तू गाडदि मां किलाई?”
दिनेन काटी शिर तै न तौं का,
लि आए तौं का धड़ जज्ञ मांझे ॥ 28 ॥

लुकाइ दीनेन त शिर व गौणे,
बिसरौण कू तैं खुद तैं न अप्णी।
“सफल नि होंदो सहदेइ जज्ञ,
बिना चढायां शिर पैरू का भी ॥ 29 ॥

सुणी क सैदी कुछ बोलदे नी,
मन मां हि रौंदे अर भित्र जांदे।

मुंडली व गौणे लगि ज्यूं निकाल्न,
देखदे अचम्भा, वख पुत्र खेलणा ॥ 30 ॥

छाती लगौंदे छ धडक्दे छाती,
मामा कु तौं भेंटण भैर लौंदे।
न जज्ञ तख छ न भुला सदेऊ,
होलो इनो जाग्रत स्वप्न वीं कू ॥ 31 ॥

“त्वै कू छ धन्य ऽ सत कू भि तेरा,
ग्यान ऽ तेरो धन्य सत धर्म तेरो।
रई सदा तू सुख शान्ति से भी,
स्व धर्म रक्षा व्रत होव तेरो ॥ 32 ॥

आकाश-बाणी सुणदे सदेई,
द्वी हाथ जोड़ी इनि बिन्ति कर्दे।
“हे देबि! धन्य ऽ धन तेरी लीला,
खोई दिने त्वै न ममत्व मेरो ॥ 33 ॥

जौं कू छयो जाणदो प्यारो आपणे,
दुखी छयो जौं का वियोग से मैं।
स्वरूप तेरा हि छन ऽ सभी ये,
माया न तेरी भरमै रख्यां हम ॥ 34 ॥

होयो इनू ज्ञान सदेइ कू धै,
भागी गये मोह ममत्व वीं को।
स्व कर्मु का बन्धनु से त छूटी,
संसार सेतू बिटि पार होये ॥ 35 ॥

यो गीत सैदी को बसन्त मास,
औजी सुणाला अपणी दिसौं कू।
दिसा सुणी क खुद बीसराली,
सन्मान कर्ली निज मैति औज्यौं ॥ 36 ॥

पुछली तऊं से भि त बात मैते,
प्रसन्न होली सुणि बात मैते।
देली तऊं को धन और कपड़ा,
भेंटेलि तौं से निज जाणी मैते ॥ 37 ॥

प्रसन्न होई अर नाचि खेली,
स्ये औजि देला सब कू असीस।
“सदेइ कू मंगल होये जन्ने,
होयान उन्ने तुम कू भि सैबो ॥ 38 ॥

मैतुड़ा बुलाली ब्वे



मनोज इष्टवाल

चै त्वळि हो अर डांडयूं मा मौळ्यार अर जिकुडि मा उलार नि हो इन कन हवे सकद ? प्योळि को फुलार, घुघुति को घुराट अर जिकुडि को झुराट एक दगडि होण लगद । डांडि-कांठयूं का भीटा पाखा खिगताण लगदन, अनमनि भांति का रिंगळ पिंगळ फूल अर मौळ्यार का कोंपळा रीं मुन्थाको बिगरौ करण लगदन, धरति का ये श्रृंगार का दगडै डांडि कांठयूं का रैवास्यूं का मन को उलार गीतों मा बगण लग जांदा अर तब हर थाड़ मा थड्या, चौंफळा, चांचडि झुमैलौ कि रंगत गांदि उंठण्यूं अर नाचदि खुटयूं मा साफ दिखेण बैठ जांद ।

सीरी पंचमी भै झुमैलो
के-के को ज्यू ब्वाद झुमैलौ
पळिगो बाडि भै झुमैलो

अर

नै डाळी पंथ्या जामी
कै-कै का सतन नैडाळी पंथ्या जामी
द्यवतों का सन्तन नैडाळी पंथ्या जामी ।

जन्म : 29 जनवरी, 1966
कृतित्व : जौनसार बावर संस्कृति एवं सामाजिक परिवेश (ग्रन्थ), दर्द का रिश्ता, फर्स्ट अफेयर ऑफ माई लाइफ (लघु उपन्यास), बिखरा हुआ सा वुछ (काव्य संग्रह) (प्रकाशनाधीन)
सम्मान : गेस्ट ऑफ ऑनर, सद्भावना सम्मान नेपाल, हरितालिका तीज सम्मान, यूथ ब्रिगेड एक्सलेंस अवार्ड, नारद सम्मान
सम्प्रति : पत्रकारिता
मो० : 9634865226

प्रकृति का प्रति मनख्यूं कि मनख्यात अर द्यवतों का दगडौ भाव यों गीतों मा अर रितूरैण मा दिखेंद बोलदन कि ऋतु पर्वो अर ऋतु गीतु की लोक परम्परा से ही ऋतु काव्य बि रंचे गेनि । मनख्यूं का मन ऋतु अनुसार बदलेणा रौंदन स्वाभाविक बि छ जन प्रकृति को मिजाज बदललो तनि अनुभूति मनख्यों तै बि होण लगदन अर तनि भाव का गीत बि बदलेणा रौंदन यनि रौंद बसन्त मा बासन्ती की रंगत यानि ऋतुराज की ऋतुरैण ।

प्रकृति का दगडौ यनो मेल धीरे-धीरे खराण लागि गे । नौकरि चाकरि को लोग डांडि-कांठयूं बिटि भैर क्या निरलण लगिन कि वो अपणि रीं रौंथळि धरति से बि दूर हवेगेनी जब धरति अर प्रकृति का दगडौ मेल ही नि रै गि त उनु भाव बि कख रै जाण जन कबि यख का रैवास्यूं को अपणा लोक से रौंदो छौ, बस यानै चैत्वळि बि अर मैत्वळि बि बिसरेण लागिगे ।

चैत अर चैती

जब तक लोग अपणि धरति से जुड़यां रैन त वो मन से अपना लोक अर लोक परम्परो से बि जुड़यां रैन यी जुड़ाव छै। जैन बसन्त का यूं बासन्ती गीतु कि रंगत बसन्ती, झुमैलो खुदेड़ गीत अर चैती गीतु मा बूणि, ये लोक का मनखि बसन्त का बासन्ती गीतु तँ लोक जीवन मा फलदा फुलदा गृहस्थ जीवन पर सुबरौंदा छ कि जन फूल फुलणा जन तनि हंसि खुशि जीवन बि फलणु फुलणु छ।

झुमैलो गीतु मा प्रकृति को बिगरौ अर मैते याद दगड़ा दगड़ि दिखेद अर यामा झुमैलो की टेक दगड़ा-दगड़ि चलदि कि—

मेरा मैत्यूं कि पुगडयों को मेंडा झुमैलो,
फ्योळिन पिंगळा ह्वेला रिंगळा झुमैलो।
मेरा मैत्यों का डांडा कांठा झुमैलो,
लाल डोला बुरांस का साजला झुमैलो।

ऋतुगीतु मा गढ़वाळ मा सबसे जादा खुदेड़ गीत ही मिलदन, वे कि खास वजै शायद यि डांडा कांठा छन कि धार पोर होंदै अपणों गों मुलुक नि दिखेंदो अर य खुद जादा कै बेटि ब्यार्यू कि होंद जो अपणां मैत कि खुद मा खुदेणी रौंदन, अर मौळ्यार का टैम पर त य खुद बकिबात कि लगद अर ब्वेकि खुद त क्य बोन? यानै साख्यूं बिटि यो गीत गयेणो छ कि—

मैतुड़ा बुलाली ब्वे बोई होलि जौं कि
मेरि जिकुड़ि मा ब्वे कुएड़ि सि लौं कि।

मौळ्यार यानि बसन्त औण को मैना चैत अर ये टैम पर मन को उलार बि उनि पैजण बैठद जन डाळ्यूं पर कुंपळा पैजदन फूल खिलण बैठदन यी बगत चैती पसारा को बगत बि यानै चैत तँ नाचदो मैनु बि बोले गे होलो चैत मा चैती गीतु का भाव बि खुदेड़ ही मिलद जादा किलैकि दीसा भेंट को जयां औज्यूं का कंठ मा बि इनि गीत बस्यां रौंदन जो दीसा धियाण तै वीका मैत की याद दिलै देदन, चैती मा फ्युंळि अर सदेई की गाथा जादा गए जांदन अर यूं मा मैत कि खुद खूब पसरी छ।

ये रौत्यळा मुलुक बिटि लोग त चलि गेनि जो छै बि छन तौन अपणां रीति रिवाज छोड़ियालिन पर धरति न अपणों सत नि छोड़ि। धरति को स्वाणु मिजाज अज्यूं बि उनि बिगरैलु छ जन साख्यूं पैलि छै। आज बि फ्युंळि मौळ्यार मा मुलमुल हैसण लगजांद अर बुरांस अपना खिलणै कतामति मा खिगताट कैरी।

यखै उकाळ उंदार अज्यूं उनि छ उकाळ चैदी गौळि उनि उबांद, उंदारिउंदै खुटि आज बि उनि रड़दन, यख रौण वळा मंगर्यूं मा पाणि उनि छम्बटु लगैकि पेंदन अर छोया छंछडौं को खखळाट बि उनि छ बस यांतै मैसूस करदन भोगदरा कम होणा छन दिनोदिन।

□□

चैती सदेई गीत

• अनिल बिष्ट

फ्योळी फुले पय्या फुले एक पती दुपती
हे मादेब सदेई दिशा निरमैत्या खुदेंदी
मौळिगे होली दिशा शिलंगे कि डाळी
जै डाळी पाळि तिन पाणी चारि चारि
शिलंगे कि डाळी मूडी टुळ-टुळ वा रोदीं
हे मादेब.....

लखी पखी डांडी काठियूं घुगूती घुरांदी
गैल्या मैल्या जांदि मा मेल्वडी बासदी
उडि उडि कफुवा न्योली मैत्या देश जांदि
हे मादेब.....

भाई होला जौंका देला टलखी अंगडी
चूडा बुखणं स्वाळी लगड़ी पैतुड़ी
दगड़ा की मैत्या ध्यांण मैत्यूं मा भितेन्दी
हे मादेब.....

त्वे कु होयूं च दिशा फापडौ सि पांणी
कन होन्दा भै भतीजा मैन नि जांणी
भै भतीजौ बाना दिशा कन ज्यान खोन्दी
हे मादेब.....

लोक गायक
विकास मार्ग पौड़ी

□□

गढ़वाळी पछांणक



डॉ० सुरेन्द्र दत्त सेमल्टी

दुनियां कि हर चीज अर हर जगा अपणा विशेष गुणों सी एक दूसरा सी भिन्न होंदिन। यूं भिन्न गुण अर विशेषताओं का कारण ही एक वस्तु दूसरी वस्तु की तुलना मां अच्छी या बुरी हवैक अपणी विशेष पछांणक बणौंदिन। जख तक गढ़वाळ का प्रश्न छ, यख कि अनेक विशेषता छन जु दुनियां का अन्य स्थानों सी भिन्न अर महत्वपूर्ण छन।

भौगोलिक दृष्टि सी यु क्षेत्र अनेक रंगो सी युक्त छ कखि घणा जंगल त कखि खरड़ा धालडा। कवी हिस्सा गाड़-गदनों सि भट्यूं छ त कखि पाणी ना का बरौबर। उच्चा-उच्चा चुणख भेळ भि यख छन अर गैरा-गैरा कुबच्यारा भि। इन्नि कवी हिस्सा भारि ठण्डन त कवी गरम। बोलि-भाषा का हिसाब सि भि यखै अन्वार अपणा ढंगै अलगै छ। यख ल, ड, ण, न जना अक्षरु सि बण्यां जादा शब्दु को प्रयोग करे जांद। उदारण का तौर पर उमाळ, बिंवाळ, उकाळ, बळद, गौडु, बौड़, खौड़, ल्हसण, चणै, दनकण जना हजारौं शब्द यख का जनमानस द्वारा ब्वन अर सुण्णक मिल्दन। यख का लोगु को खान-पान भी अलग ही छ अर वूको नामकरण भी आंचलिक आधार परह हव्यूं छ। झोळी, झंगोरू, फाणू, धापड़, गिंजडू, छंचेडू, बाड़ी, बड़ील, सात्तु यखा का इना भोज्य पदार्थ छन जो यख हवयां अन्न सी बणये जांदन।

यख का लोग पैली बिटि आस्थावन रैन। ये कारण ही यख तंत्र-मंत्र, ज्योतिष, देवपूजन मण्डाण, घड्याळु, संगरंद का दिन घर-घर पर ढोल बजौणू, चैत का मैना परिवारू कि खुशहाली का वास्ता ढोल-दमौं का साथ-साथ मंगल गीत लगाणू, पंचमी तै जौ की हर्याळी बांटणी जनी कै परम्परा गढ़वाळ की धार्मिक भावना तै व्यक्त करदन। गढ़वाळ मां खासकर इलाज तंत्र अर आयुर्वेद विधि सी करे जांद। या भूमी जड़ी-बूट्यो को भण्डार छ। यख इनि-इनि जड़ी-बूटी छन जौ सि दुनियां की जादातर बीमारयो को इलाज हवै सकद, पर य हमारी अज्ञानता छ कि हम व सणि पछांणि नि सकदौं अर अजाक बणिक नुकसान पौंछौंदौं।

गढ़वाळ मां उन त हरेक पर्व पर खोळा-मेळों को आयोजन होंद पर बैसाख एक इनु मैनु छ जबारि प्रत्येक दिन जगा-रिंगला झुनकौं पैरिक वख जांदन। यूं दिनू गढ़वाळ मां बड़ी रैं-पैं रंदी। अब त जमानू धीरा-धीरा कै तै बदलेण लगी पर एक समै गढ़वाळ मा इनु भि थौ जब कै थौळ मां

- जन्म : 11 अक्टूबर, 1955
 प्रकाशन : 8 पुस्तकें प्रकाशित
 सम्मान : शैलेश मटियानी राज्य शैक्षिक पुरस्कार से सम्मानित
 सम्प्रति : माध्यमिक शिक्षा मा अध्यापन
 सम्पर्क : ग्राम व पत्रालय पुजार गाँव, चंद्रबदनी, टिहरी गढ़वाल
 मो० : 9690450659

जनानि सिसफूल, पौंछी, झिंवरि, जैजी, पौटा, खखळा, गुलाबन्द जना कै गणों सी सजीक जांदी थे। हक्कि तिर्प गों -गों बिटि ज्वान-ज्वान बैख हाथु पर मोटा- मोटा लाठें लीक ढोल-दमौं दगड़ि नान्चदु-नाचदु जांदा था। गढ़वाळ की पछांणक कायम कन्न मां ई परम्परा को भौत बड़ हाथ छ।

यख का पाणी, बथौं अर माटा मा बडु रस छ, जांसि यख कि धरति मां काफळ, धिंघारू, हिंसर, फळेण्डु, किनगोड़, खैणा, केमू, कर्वन्दा, तिमला, ब्योडु, बुरांस जना कै रसीला फलु का डाला अपण आपी उगि जांदन।

गढ़वाळ का लोग भारि सौकीन रैन। ब्वगट्यों कि लड़ै करौण, तास ख्यन्नु, रस्सा कस्सी, नौर्ता, मण्डाण, घड्याळू, बाद्यों को नाच, अखाणा-पखाणा, कथा-वार्ता, गीत-पवाड़ां लगाणों, हंसी-मजाक कन्नो जना कै काम ऊंका मनोरंजन का साधन रैन। खाणि-पेणि का हिसाब सि यख का लोगु कि अपणि खास पछांणक छ। जु मजा यख का अन्न सि बण्या रोट, आर्सा, स्वांला, पकोड़ा, मस्वालि अर पापड़ि खाण मां औंद उ सायद हि सैरू - बजारू कि मैंगि सि मैंगि मिठयों मां हो। यख का चौंलु-झंगर्याळु का बुखणों अर चूड़ौ बुकाण को बि अपणु अलगै स्वाद छ। बसगाल का मैनों चर्चरा-बरबरा लोण-मर्च दगड़ि हरीं काखड़ि खाण अर सुलबुल्या भड्याई ताति-ताति मुंगरि बुकाण मां भि जु आनन्द छ उ तरबूज, खरबूज खाण मां कबि नि ह्वै सकद। कतना भाग्यशाली छां हम जु इनि रसीली धरति मां जनम लीनी।

नाता-रिस्तों का हिसाब सि भि यख कि पछांणक अलगै छ। बडा, बडी, काका, काकी, भेना, बै-बुवा, लड़ीक, जीओरू, ज्यरजु, दिदा-भुला, बौ, स्यालु, बैण, जनानी, मालिक जना कै नौ इना छन जो गृहस्त्यों का सभी रिस्तों तैं एका हक्का सी जोड़दन।

संगीत प्रिय होणू गढ़वाळ का लोगों को जन्मजात गुण छ। एं हि वास्ता यख का जनमानस द्वारा ढोल, दमौं, मसकबाजु, सिणें, हुड़की, डौर, थाली, बांसुळि अर डौर-थाळी इना चमत्कारी वाद्ययंत्र छन जो देवतौ अर भूतू सणी भी जागृत करि देंदन। गढ़वाळ का वाद्ययंत्रों को जादातर उपयोग यख का दास अर बाद्दी जाति का हरिजन पेशा का रूप मां करदन, जो कि वूंकि आजीविका को एक महत्वपूर्ण साधन हौंद।

कला का क्षेत्र मां बि गढ़वाळ को विशेष महत्व छ। यख का मन्दिरों का भित्ति चित्र, मूर्ति, मन्दिरों की बनावट देखिक हरेक व्यक्ति आश्चर्य मां पड़ि जांद, किलैकि यख का इ मन्दिर जौंकि मूर्ति साकार अर सप्राण लगदीन आज कि निव बल्कि वै जमानाका बण्यां छन जबरि गढ़वाळ मां औंण जाण का कवी भी साधन निथान कै दिनों का बासा बसिक लोग लोण, गुड़ु जनि साधारण चीज्यों लेण का खातिर ऋषिकेश अर कोटद्वार जांदा था। तकनीकी शिक्षा त रै दूर

व्यवसाय की दृष्टि सी भी गढ़वाळ की अपणी एक विशेष पछांणक छ। यख का लोगू को पेसा मुख्य रूप सी जाति अर धर्म का आधार पर बट्यं छ। बरमविर्ती, सरोला, पुजारी, मिस्त्री, ल्वार, सुनार, धुनार, कोली, दास, दर्जी, बाद्दी जना कै पेसा यख पीढ़ी दर पीढ़ी थोड़ा-भौत परिवर्तन का दगड़ि समाजमा विद्यमान छन। यख का लोग आतिथ्य सत्कार, सुशील भोला-भाला, देशभक्त का साथ ही साथ सुख-दुख मां साथ देण वाळा, मिलि-जुलि तैं काम कन्न वाळा, परिश्रमी, ईमानदार अर कै गुणों सी युक्त छन।

आवश्यकता छ ई बात की, कि हम गढ़वाळ की सबि परम्पराओं, रीति-रिवाजों की तन-मन-धन सी रक्षा करौं, जौंसी हमारी या संस्कृति दुनियां कि अन्य संस्कृतियों का साथ अपणो महत्वपूर्ण स्थान आसानी सी बणै सको, अर हम भी ई बात सी गर्व को अनुभव करि सकां। गढ़वाळ वा धरती छ जख देवतौंन अर ऋषि मुन्योंन अपणू जीवन आनन्द सी बितैतैं दुनियां को कल्याण करि।

पर सामान्य शिक्षा लेण की भी कवी सुविधा नि थै, तै जमाना का लोक कलाकारोन साधारण छेणी अर हथेड़िन पत्थर तरासितैं अपणी कला को जो उत्कृष्ट परिचय दीनी उ अविस्मरणीय अर स्तुत्य छ। मात्र पत्थर पर ही नी वल्कि लकड़ी पर भी यूंन अपणा बसूला अर न्यांण सी ज्वा चित्रकारी करी वींसणी आज का साधन सम्पन्न अर प्रशिक्षित कलाकार लाख प्रयास का बावजूद भी नी करि

सकदन। उदाहरण का रूप मां गढ़वाळ का हरएक गौं मां जीर्ण शीर्ण अवस्था मां विद्यमान तिबार्यों का खम्म, दरवाजा, खिड़की औण वाळी पीढ़ी तैं गढ़वाळ की पुराणी पछांणक बतौण अर प्रेरणा लेण की जरूरत छ इतना ही ना वल्कि खेती-बाड़ी मां काम औण वाळ हथियार बणौण, साधारण गृहस्थी का बास्ता उपयोगी सामग्री मुरेठा, मांदरा, जूड़ा, दौं, मुसगा, रोटाना जनि कै चीज्यों बणौण मा बि यख का हस्तशिल्पी आज बि ई परम्परा कायम रखण मां लीन छन लोक का कलावंत।

अपणा ए छोटा सी लेख मां गढ़वाळ का कुछ चामत्कारिक बातों पर लिखणू भी मैं जरूरी समझदौं। देवता की दृपटा देण पर भूत-भविष्य अर वर्तमान का बारा मां वाक्की कू सच-सच बोलणू, हाथ पर हरियाली जमौणू, जौ-जनानों अर बालबच्चों पर भूत लगण सी बानि-बानि का छलबल दिखौणू, झाड़कण्डी द्वारा भूत भगौणू, सर्प-विच्छी को जहर मंत्र द्वारा हयैणू, दांत, कान, सिरदर्द, पीलिया जनि कै बीमारी तंत्र-मंत्र सी ठीक कन्नु, घड्याळ लगण सी नागर्जा नरसिंग को दोस शान्त कन्नु जना कै काम यख की संस्कृति की चामत्कारिक विशेषता छन।

गढ़वाळ का बारा मां जनु ब्वल्दन कि या धरती वीर अरं भड़ की मातृभूमि छ, वास्तव मां यख समय-समय

पर बड़ा-बड़ा वीर अर भड़ पैदा हवैन, जौन अपणा जीवन मां असम्भव सी असम्भव काम करिक दिखायन। समाज की भलै का खातिर अपणी या अपणा पुत्र की बलिदेण, सकय सी जादा बोझ उठौण, भौत जादा भोजन कन्न जना कै काम गढ़वाळ का ज्ञात अर अज्ञात अनेक लोगून करिन।

व्यवसाय की दृष्टि सी भी गढ़वाळ की अपणी एक विशेष पछांणक छ। यख का लोगू को पेसा मुख्य रूप सी जाति अर धर्म का आधार पर बट्यं छ। बरमविर्ती, सरोला, पुजारी, मिस्त्री, ल्वार, सुनार, धुनार, कोली, दास, दर्जी, बाद्दी जना कै पेसा यख पीढ़ी दर पीढ़ी थोड़ा-भौत परिवर्तन का दगड़ि समाजमा विद्यमान छन। यख का लोग आतिथ्य सत्कार, सुशील भोला-भाला, देशभक्त का साथ ही साथ सुख-दुख मां साथ देण वाळ, मिलि- जुलि तैं काम कन्न वाळ, परिश्रमी, ईमानदार अर कै गुणों सी युक्त छन।

आवश्यकता छ ई बात की, कि हम गढ़वाळ की सबि परम्पराओं, रीति-रिवाजों की तन-मन-धन सी रक्षा करौं, जाँसी हमारी या संस्कृति दुनियां कि अन्य संस्कृतियों का साथ अपणो महत्वपूर्ण स्थान आसानी सी बणै सको, अर हम भी ई बात सी गर्व को अनुभव करि सकां। गढ़वाळ वा धरती छ जख देवतौंन अर ऋषि मुन्योंन अपणू जीवन आनन्द सी बितैतैं दुनियां को कल्याण करि।

□□

फार्म-IV (नियम 8 देखिये)

धाद

- | | |
|---|-----------------------------------|
| 1. प्रकाशन स्थान | : पौड़ी |
| 2. प्रकाशन अवधि | : मासिक |
| 3. मुद्रक का नाम: | : गणेश खुगशाल 'गणी' |
| राष्ट्रीयता (क) क्या आप भारत के नागरिक हैं? | : हां |
| पता | : 126, विकास मार्ग, पौड़ी-246 001 |
| 4. प्रकाशक का नाम: | : गणेश खुगशाल 'गणी' |
| राष्ट्रीयता (क) क्या आप भारत के नागरिक हैं? | : हां |
| पता | : 126, विकास मार्ग, पौड़ी-246 001 |
| 5. सम्पादक का नाम | : गणेश खुगशाल 'गणी' |
| राष्ट्रीयता (क) क्या आप भारत के नागरिक हैं? | : हां |
| पता | : 126, विकास मार्ग पौड़ी-246 001 |
| 6. उन व्यक्तियों के नाम व पते जो समाचारपत्र के स्वामी हैं तथा समस्त पूंजी के एक प्रतिशत से अधिक के साझेदार या हिस्सेदार हैं | : नहीं |

मैं गणेश खुगशाल 'गणी', एतद्द्वारा घोषित करता हूँ कि मेरी अधिकतम जानकारी एवं विश्वास के अनुसार ऊपर दिये गये विवरण सत्य हैं।

दिनांक : 14 मार्च, 2017

ह०—
(गणेश खुगशाल 'गणी')
प्रकाशक

माटी की काया को बसन्त (बसन्त) ऐगे

• कन्हैया लाल डंडरियाल



पसरी छ मुँड जून, लुकि गैन गैणी
रीठौं की मेलि रै गैन, ऊँकी निशाणी।
गल्बड्यूँ की पख्यट्यूँ मा, भर्वीकंप ऐगे।
माटी की काया को बस 'न्त ऐगे।

जम्यळी की डाळि-बोट्यूँ को, पोड़िगे ठयक्का,
गिचि का संगड - मोर, दे गैनि धक्का।
डरदी यकुलि जीभ, लपटाण लैगे,
माटी की काया को बस 'न्त ऐगे।

फौंकी टुटीं सी हत्ति हलदन बथौंला,
भंगुलै-सि केड़ि खुट्टि चलदन धिक्कौंला।
गंगा सिळौण्यौं फूल हँसण लैगे,
माटी का काया को बस 'न्त ऐगे।

भट्यूँ की सार्यूँ मा, रूणा छन स्याळ,
रयेंसु की लगुल्यूँ का, सुखि गैनि झाल
पुटगा का फाँग आड़ो, अंदडौं को रैगे,
माटी की काया को बस 'न्त ऐगे।

माया को दारु पेक, अटगू नी ब्लाया।
जति घरु दौड़ौ लोळो, तति घाव ह्वाला।
काली का थान समणि, खड्ग धरे गे,
माटी की काया को बस 'न्त ऐगे।

अर्जुन को गाँडीव, बणि गे यु तीग
कुँडल कवच, आयु माँगीक ल्हीग।
गौळी का गाळ फर, शंख बजी गे,
माटी की काया को बस 'न्त ऐगे।

फ्यौंळी

• भगवतीचरण निर्मोही

ऐगे फागुण को यो मैना, फ्यौंळी तू फूल फूल,
 फ़ैले बसन्त सब बणू बणू, तू भी मेढियों मा झूल झूल,
 मैं आजि पड़यूं छौं बड़ी दूर, तू भी आंख्यूं की छई ओट,
 पर त्वै सणि समळि समळीकी, जिकुड़ी पर लगदी बड़ी चोट।
 तू नई उलारी ऋतु लहेकी औन्दी बौड़ौन्दी भुली खुद,
 तू कदी बटोई सणि उदास, त्वै देखी भुलदन सभी सुद,
 छै तू रैबारू ऋतुपति की, ऐकी तैं देन्दी इनो बोल,
 ऐगे बसन्त ऐगे बसन्त, हे दुनियाँ अपड़ी आँखि खोल।
 बिसरौं मैं तेरो कनू करी, बिगरैलो सुन्दर भलो गात,
 हलबलो कलबलो मखमल सी, मुरझौन्द जरा सी लगै हाथ,
 घुँघटी गाड़िकि मेंढ्यूं मा बैठीं रन्दी तू इनू टुप्प,
 पीलि चदरि ओढ़ि कि तैं, बैठीं हो ब्योलि जनू चुप्प।
 हिंस्रे किनगोड़ी चौलाई सकन्यो अलमोड़ो डुँडबिराल,
 राडो लय्या, पय्या, आरु, धौलो भी फूलद लाल लाल,
 फूली फूली की बाग बणू, करदन रोंतेलो बणै झक्क,
 सब छन सुन्दर ये भला भला पर त्वै डेखीकी सभी फक्क।
 फ्यौंळी! त्वै सणि क्या आज सुणौं, आपणा दुखी मन को उमाळ,
 ये दुखी उलारा प्राणी को, बौळ्या को सी बणिगये हाल।
 ओन्दू छौं जब वो चैत मास, फेंकदा छा देळ्यूं माँगै फूल,
 वै बाळापन की याद करी, चुभणू जिकुड़ी पर एक शूल।
 सरसरसर बिनसरि को बथौ, जाँदा छा पर हम दौड़ि दौड़ि,
 अपनी टुपर्योँ पर फूल भरी औँदा छा झटपट घरु बौड़ि।
 कख गैने वो दिन वो दगड़या, कख गये उमर कखगै उमंग,
 कख गै वो सुन्दर समय हाय, कखगै सारो राग रंग।



तू झुमदि झुमदि ही रैली, जब जब आलो प्यारो बसन्त,
 बिसरैली अपणी सरी खुद बौड़ी बौड़ी ऐली तुरन्त।
 मैं कू पर दुर्लभ होइ गैने, दिन बीत गैन सो गैन बीति,
 अब चला चली का दिन ऐने फीकी ह्वे गैने सबि रीति।
 ये दुखी मन मा कभी कभी, उठदन ऐ की कत्ती तरंग,
 जिकुड़ी निर्मोही करी करी, मैं सदा दबौन्दू छौं उमंग।
 हे प्रिय बसन्त की दगड़याणी, ले ले मेरो आशीरवाद,
 तू खुशी रई पर कभी कभी, मेरी भी करदो रई याद।

□□

गढ़वाल का इत्यास की कैला



कमल रावत

बाघ आंद लुकदो-लुकदो, कुकुर आंद भुकदो-भुकदो, ठीक ई तरज पर बाघ जन बणी महीपत ठाकुर न राजमोहल सिरीनगर मा परवेश करी। राजमोहल न अबी ठीक से अपणा आंखा बीति खोलि छा। चैता मैने वीं सुबेरी कैन बी वे अर वेका द्वी सौ तलवार धारी अंगरक्षक सिप्यैयून पर शक नि करि, न ही कैन रोकि-टोकि। किल्लै कन छौ कैन यन? आखिर स्यू श्रीमंत राजा दुलारामसाह को मुगतियार अर रिश्ता मा कुटुम्ब को दादा लगदो छौ। सौनक गोत्री, परमार वंशी। पुशितयूं बटि वे का पुराणा 'बद्री विशाल' कि गादी, सैणा सिरीनगर कि राजगदी क सेवक छा। गढ़देश पर वूं को एक क्षत्र राज छौं।

कारबारी साल बुटोला समेत सिरफ कुछेक दरबारी वेका विश्वस्त, वे से मिल्यां छा। अंगरक्षक सिप्यैयून राजधानी अर राजमोहल घेर दिनि। साल बुटोला दगड़ि जैकि ऐंच त्रिपुरा महीपत ठाकुरन स्वर्ग होयां पन्द्रह बरसा श्रीमंत राजा दुलाराम क मुरदा शरीर क दरशन करीन। सैद वू शंका दूर करण चाणो रै हो कि वाकई 'बोलांदा बद्री' स्वर्ग हवेन कि ना। राजमोहल मा वेका सिप्यै जगा-जगा खड़ा दिखेण लगीन। अब रणिवास कि बारी छै। अपडा आदमियूं दगड़ी राणिवासे देहली पौछीं ठाकुरन धै लगै-

“कैला, हे कैला।”

“ऐ गयूं।” भितिर बटि कैला धाई भाग-भागी, मुंड मा सपकू सम्मालदो ऐई, अर महीपत सामणी खडु देखीक धक रै गि, जन बोलयो वीन सचमुच बाघ देखीली हो। “हे ठाकुर तुम! अर फिर झट करी बोली “समन्या”।

“समन्या, अबी-अबी यख पौछयूं, नाती श्रीमंत माराज दगड़ी जरूरी राजकाजै सलाह मशवरा करण छौ पर यख ऐ कि पता चली कि वू स्वर्ग हवेगेन। मैं रैबार किलै नी भेजे गी? क्या मरयां मनखी कि सद्गति नी होदं?” एक सांसा मा, महीपत बोलीगे।

“वू, वू ठाकुर, तुम अर कुँवर भानसाह यख बटि दूर अपड़ी ज्युला जागीरों मा छावा, तुमुन दादा होण क खातिर अग्नि नी देण छै यांक बाना कुँवर भानसाह लाणो हरकारा धाति धनारि पठायां छन।” थूक घूटी कैलन सफै दे।

जन्म : 1 जनवरी, 1975
शिक्षा : एम०ए० थिएटर
सम्पर्क : ग्राम व पत्रालय-खण्डाह,
पट्टी कटूलस्यूं, पौड़ी गढ़वाल
सम्प्रति : कृषि एवं दुग्ध उत्पादन

“मी गढ़देश को मुगतिहार छौ, अर ये राज्य क संचालन अर सुरक्षा क खातिर मैंते सर्वप्रथम मृत्यु खबर होण चैणी छैं” गुस्सा पेकी अर अफ तें सम्भालीक वेन बोली- “मेरा पिसनै-पिसनै कुँवर भानसाह भी पौछण वाळ च। उफल्डा फुन्ड पौछ गै होलो मी अगनै वे को स्वागत करणो अयूं, अब राजगदी पर वेन ही बैठण।

“अच्छ कुँवर पौछण वाळ च?” कैला कि आंखियूं मा चमक ऐगी।

“हाँ हाँ, तू यन कर राजा तें पैराये जाण वाळ राजसी लता कपडा, मुकुट पगड़ी, गजगाह, खाण्डो, सब लयो, हर मेरा सामणी धर दी। बिजाम दिन हवेगेन राजगदी खाली नी रखे जांद।” महीपतन उलाहणो देकी बोलि।

“मि अबी आंद।” कैला उल्टा खुट्टौन भितिर रणिवास भागी, अर थोड़ी देर मा झट करी, बडी-बड़ी ताम्बे परात, दासियूं मु पकड़ैकी, राजसी लता वे पर धरयां, महीपत ठाकुर का सामणी धर दिनी।

“लिया ठाकुर सम्भाला। मी कुँवर भाना तें देखदों।” ये बोली वा दासियूं दगड़ी कुँवर देखणो हडबड़ी मा राजमोहला भैर भागी।



इकहरी गाति पर भगोया अंगिया- घाघरी पैरौ कैला ठोस ईच्छा शक्ति की जनानी, राजा श्यामसाह कि हिमाचली राणी क डोला दगड़ी दैजा मा ऐई छै। राजा श्यामसाह गंगाजी मा किशती डुबण से दरबारियूं समेत स्वर्ग हवे छ। राजा दगड़ी सती होदं दां राणीन दुलारामसाह अर बाला भानसाह तें वीकी कोळि मा रखी बोलि छै- “कैला यूं ठीक से सम्भाली।” अर दगड़ा मा सुरक्षा का वास्ता एक खाण्डो भी दिनी जु अब तलक वी क कमर मा लटगणूं च। राजराणी कि जगा वीकों ओदां राजमाता को हवे अर राजा कि सुरक्षा वी का जिम्मा ऐई। वजीर, दीवान, दरी, पोरी, चाकर सबूं तें वीक ताकत-अधिकार को अदांजा छै। कैलन अपड़ी दूधी पिलै कि द्वि कुँवर सैंतीन पर ये चैता नाचदा मैना, पूरणमासी की होरी क दूसरा दिन, छरोळ्यूं तें पन्द्रह बरसो राजा दुलारामसाह गंगाजी क छाला भीटा बटि तौळ गंगलोड़ों मा पोड़ी, मुन्ड पर चोट फटाक आयी अर राजमोहल ऐकी पांच-सात दिनों मा वेन पराण छोड़ दिनी। दिवगंत राजा

दुलारामसाह को मुर्दा भितिर आठ-दस दिन बटि राजमोहल मा सहेजी रखयूं च।

कैलान अब मरी हँका दिन राणी तें कन मा मुख दिखाण? हाँ भरपाई सिरफ यान हवे सकदो च कि अब राजगदी पर दुलारामसाह को छोटु भुला कुँवर भानसाह गादी पर बैठो। वी को जीवन को अब यू ही धेय छै। पर ये धेयन वी चिन्ता हवेगी। चिन्ता क्या हवें, चिन्ता वी खाण लगी। कखी क्वी विघ्न नी पोड जाव। विघ्न भी क्या कि विघ्न घौर ही छै, पचास बरसो, कुँवर को ‘कक्या दादा’, मुगतिहार, प्रचंड, भुजदंड, गरबभजन, फौजदारूं को फौजदार, बमुण्ड को जागीरदार, रौबदाब वाळो ठाकुर महिपतसाह। जैकी नजर राजगदी पर छै, क्या नि करयूं छै राजा को वे कु तें? पर कुकुरो पेट टुकड़ोन नी भोरेन्दु। सैब ऊँच-नीच जाणी समझी कैलान कुँवर भानसाह लाणो हरकारा पटै छ थाती धनारी, भिलंगना पार राजा दुलारामसाह कि मृत्यु खबर प्रजा अर दरबारियों से लुकायेगी। पर क्या वा यख मा सफल छै?



दस खोळी, बावन बुर्ज अर बिजाम परकोटोन घिरयां ‘बोलदां बद्री’ क मोहल बटि कैला भैर ऐई अर इनै-उनै नजर डाळी, क्वी नी दिखै। वी कि आंखी कुँवर तें खुजणी छै, वी क पिसनै-पिसनै दौडणी वी की द्वि-तीन दासी। चौकोर कटवां पठालिया चौक हवेकी कैला पश्चिम दिशा कि खोळी बटि भैर चली ऐ, जान कुँवर भानसाह शीतला रेती, गोरखनाथ मढ़ि जनै बटि आंद दिखयों। पर कुँवर को कखी अता-पता नि छै, तबरी जयकारों की आवाज वी क कंदुणु मा पोड़ी, निराश हुंई वा चौँकि, टकटकी हवे, अर खुशी को ल्यो वी क शरील क नसू मा दौडण बैठी या जाणी कि यी जयकारा कुँवर भानसाह को तें लगणा छन, जो कखी नजिक हि आणो च। कैलान खुशी मा अपडा कन्दुणु मा हाथ धरी बन्द कर दिनी। वी को नौना समान कुँवर राजगदी पर बैठण वाळ च। पर क्या वाकई यन होण वाळो च? कैलान कन्दुणु बटि हाथ हटेन अर गौर करी फेर सुणी। अरे! जयकारों कि आवाज त राजमोहल बटि आणी च। वी को अंदाजा सही छै। ये क मतलब कखी कुँवर भानसाह हका बाठा बटि राजमोहल त नी पौछों अर सिप्यै दरबारी वे का जयकारा लगणा छन। लगै वीन दौड़ वापस राजमोहलS तें

अर सीधा देहली ह्वेकी रणिवास क बगल वाळा बड़ा कमरा मा, पिसनै-पिसनै दासी भागणी।

फटीं आंखोन वीन देखी कि सिप्यै ठाकुर महिपत तैं राजसी लता कपड़ा पैराणा छन, मुंड मा सुनहरो मुकुट-पग धर्युं च, जू वीन थोड़ी देर पैलि ठाकुर महिपत तैं कुँवर भानसाह पैराणो सौंपी छ। अंगरक्षक सिप्यै जोश मा जयकारा लगाणा छन- “राजा महिपत की जय।” राजमोहल कि सुरक्षा करण वाळा सिप्यै-गोलदार, दास-दासी सबी घुण्डो क बल बैठयां छन, वू क मुण्ड ऐंच तलवार तणी छन। कई रोणा छन। राजा दुलोरामसाह को मुर्दा तौळ लये गे छै।

कैला को ज्यू धक्क रै गी। “ठाकुर महिपत” कैला अफ तैं सम्भाली चिल्लैई- “या राजगदी कुँवर भानसाह कि च, त्वे धोखा करी राजगदी हथियोण शोभा नी देदं। बडु ऐई राजा बणण वाळ, अपडी शकल देख, अपडी उमर देख। औतु ह्वेकी गददी पर बैठण स्याणी करणी छै।”

“अपडु गिच्चु बन्द कर, द्वि टका कि दासी।” महिपत क विश्वस्त धामसिंह न कैला टोकी। कैला तैं गुस्सा यन ऐई कि वीनं जोर करी महिपत तैं धक्का दिनी कि स्यू पूठो क बल पिछनै पोड़ी अर मुंड मा को सुनहरो ठांठो दूर जैकी छिटकी। कारबारी साल बुटोला तैं स्वामिभक्ति देखौणो मौका मिली अर वेन निकाली तलवार अर कैला क गौळ की सिस्त वार कर देनी, कैलान अफ बचाणो मुण्ड पिसनै करी अर द्वि हाथ उठै कि अगनै करी दिनी। ‘खटाक’ करी द्वि हाथ कटी फर्श मा पोडीन अर दगडा मा राज भक्ति क प्रतीक हाथुं मा पैरयां ‘सोनचुड़ा’ बी ‘झन्न’ करी फर्श मा पोडीन। अब ना हाथ कामा छ, ना सोनचुड़ा ही राजभक्ति क कामा छ। सबुं क जुगड़ा कांप गेन। ल्वे कि खतरी मची, कैला भौंया पडी तड़पण लगी।

रणिवास को कारबारी, कैला को नौनु घुतसाल अगनै ऐई, निकाली तलवार अर “अपड़ी मां क खसमा” बोली वेन साल बुटोला पर तीन-चार खचाक तलवारे मार दिनी। बुटोला भी भोयां पोड़ी। राजमोहल मा चिल्लाणे भगणै आवाज आण लगीन। दरबारी-सिप्यै द्वि गुटों मा बटेण लगीन। नगदवान भड़ अर कुछेक सिप्यै घुतसाल क पिसनै ऐईगीन। तब तलक सिप्यैयून महिपत खडु केरलि छै, महिपतन एक झणझणी नजर घुतसाल क पिसनै खड़ा सिप्यैयून पर डाळी,

माना पूछणो हो कि कै कै कि मौत ऐई च? सिप्यै पिसनै बटि हट गेन। रै गिन त सिरफ घुतसाल अर नगदवान भड़। खेल कैन देखी विधाता को? जू ब्याली तलक कैला अर कुँवर भानसाह कि रक्षा कि कसम खाणा छ वू अगनै नि ऐन। मौत मुण्ड म खड़ी छै।

फिर क्या छै? तलवारुं कि आवाजन राजमोहल गूजगे। थोड़ी देर म घुतसाल, नगदवान भड़ अर महिपत क चार-छै सिप्यै कटयां केळ डाळ सी फर्श मा पोड्यां छ।

यु सब बड़ी जल्दी मा घटी।



धाम सिंह भोयां पडयां सुनहरो ठांठो उठै अर महिपत क मुण्ड मा धरी, सुरुक करी कन्दुणु मा बोली- “ठाकुर राजमोहल अर राजधानी पर हमारो कब्जा ह्वेगे।” “शबाश।” ठाकुरन धाम सिंह पीठ थपथपै। अंगरक्षक सिप्यै नारा लगाण लगीन, ‘श्रीमंत राजा महिपत की जय।’ ठाकुरन हाथ उठै कि वू शान्त होणो इशारा करी। वे क कन्दुण मा कैला कि कराहणे आवाज सुणै, वेन गौर करी बिंगी त अपडा समर्थकों क बीच ल्वेन लथपथ फर्श मा कैला तडपणी छै। वींको ही गुगंडाट सुणेणो छै। ठाकुर वीं क नजीक पौंछी।

“अच्छे ईनाम देई त्वेन मेरी राजभगती को ठाकुर, त्वे पर थु पोड्यां।” कैलान आंखा बंद करदो-करदो ताकत लगै कि बोलि।

“चुप कर रंडी”, अर ये बोली ठाकुरन वीं क कमर मा एक लात मार दिनी।

“ना ठाकुर यन पाप नी करा।” ल्वेन लतपत सात बुटोला चिल्लैई। वू बि आखिरी सांस लेणो छै। द्वि सिप्यैयून बुटोला सहारू देकी उठै वे को गिच्चू गबलाण लगी।

“मांग बुटोला, अपडो ईनाम-किताब मांग, तेरा भेजयां रैबारन मी यख अब राजा बणणो छौं, नितर फेर बैठेयेली छौ तैं कैलान राजगदी पर छोटु बाळ नौनु। बुटोला, जगा जागीर मांग, मी देलो।” महिपत करण समान बणीगे।

“ठाकुर, मैं कोट कारगी, जखण्ड, ढांगू भडांल्युं मा जागीर चैणी च।” बुटोला क आखिरी बोल मुख बटि छुटिन।

“लेखवार रतूड़ी बुलाये जाव, अर जो-जो बुटोलन बोलि सब चांदी क भाषा पत्र मा ‘अकरा’ लेखी बुटोला क

कुटुम्ब मा दे दिये जाव। जो मेरी तरफां रालो वे खुणी जान हाजिर च अर जो मेरी खिलाफत करलो वे सणी मेरी तलवार खैकार कर देलि। महिपत छौ मी महिपत।” ठाकुर तलवार हवा मा उठै कि गरजी। सिप्यैयून जयकारा लगे-“राजा महिपत की जय।”

“धाम सिंह” महिपतन अगनै बोलि।

“हुकुम ठाकुर।”

“मेरा खातिर आज जू काम ऐन, जौन प्राण दिनी, वूं को अंतिम संस्कार राजघाट पर करवये जाव, वूंका कुटुम्ब न्यौते जावन। सैरो राजमोहल गंगाजलन धुये जाव। कैला, घुतसाल अर नगदवान क मुर्दा खिखोड़ी ली जै कि गंगाजी बौगे दिया, राजद्रोहीयूं तें अग्नि नी दियेदी।” महिपतन आदेश दिनी।

“जो आज्ञा।” धामसिंहन हुंगारो लगे।

वीं रात व्याखुणी बगत बटि उच्छप मणये जाणो रै, ढोल-दमौं भौंकारा बजणा रैन, बादेणीयूं क घाघरा रिंगणा रैन। खूब चखळ-पखळ हवे। ठाकुर महिपत अर वेका सबी अंगरक्षक सिप्यै राजमोहल अशुद्ध होण का कारण भैर चौक, तप्पडुं, अमुवा बागवानो मा तम्बू मा स्वे पोडिन। ठाकुरै सुतौरी खाट आमा डाळा मूडी लगी। पर ठाकुर क आंखो मा नींद नी ऐई। झणी किलै? रात उठी त देखी कि धाम सिंह दगड्या फौजदारों दगड़ी खाणो-पेणो च।

“धाम सिंह” महिपतन आवाज लगे।

“हुकुम ठाकुर” भाग-भागी पीठ मरद धाम सिंह पौछिं।

“नींद नी आणी, जू पेणा छं मैं खुणी बी लावा।”

“अबी हाजीर होदं।” धामसिंह तें अचरज हवे अर वेन लैकि ठाकुर तें एक भोरयूं लोटय्यां पकडै दिनी। घड़ी एक बाद ठाकुरै जोर-जोर से रोणे आवाज सुणै, धाम सिंह फेर भाग-भागी वे मु पौछी। ठाकुरन वे देखी अर शान्त हवेकी पूछी-“त्वे तें डाळा पर काच्चा आम दिखेणा छन?”

“हाँ ठाकुर, देखेणा छन, यि हर साल लगदन।”

“हर साल लगदन क बच्चा। मैं बीपता च। मी जब बी रूढियूं मा यख आंद छौं त कैला आमै खट्टी-मिट्टी चटणी बणै कि मैं खलांदी छै। वीं को नौनु घुतसाल मैं भौत माणदो छौ, दादा-दादा बोली मेरी कोळी मा चढ़ जांद छौं।”

“अच्छा” धामसिंहन हुंगारो भोरी।

“अर स्यू लाटु नगदवान भड, मैं को गंगाल बटि मांछ मारी लांद छौ, मांछो को भरी काल छौ स्यू। बडु सल्ली।”

“अच्छा, पर ठाकुर सी तीनी अब रीं दुनिया मा नी रैन।”

“जाणदो छौं, तबी त रोणू छौं। धाम सिंह तू एक काम कर।”

“हुकुम ठाकुर, हवे जालो।”

“तू, चार-छै सिप्यैयूं लहेकि गंगाजी क छाला-छाला जा, हाथकट्टा फूणै वूं तिन्यूं क मुर्दा छाला लगयां होला। तू वूं दूंदी, वूं को अंतिम संस्कार वखी करी दे। उख फुनै लखडो कि कमी नी।”

“.....” धाम सिंह चुप रै गी।

“ठीक च। ये करवे दी, सुणलि त्वेन।” महिपत दहाड़ी।

“सुणलि ठाकुर..... पर यू त थुकयूं चटण हवे। आज दिन मा हमुन वूं खिखोड़ी, सबूं क सामणी गंगाजी सिरैन। लोग बोलला ठाकुर हाथन लिखदो अर खुट्टन मिटोंद। काखड़ अफी मुतो अर अपड़ी छिबड़ाटन डौरो।” धाम सिंह एक सांस म बोलगे।

“चुप कर उल्लु क घस्सा, बडु ऐ लोखूं कि चिन्ता करण वाळ, अबे लोखूं क भौणी मी राजगदी नी पै सकदों। अब प्रजा त राज कि स्वेण समान होदं। दिन अर रात क आदेश स्वेणीयूं तें अलग-अलग होदं। ऐगि समझ म तेरा, जा जू बोलेणो च, वू करी औ। वे क बाद मैं सणी खबर कर।”

“आज्ञा ठाकुर, जी आंद।” बोली-5 चडम उठी धाम सिंह अर कुछेक सिप्यैयूं लहेकि गंगाजी कि तरफां चल पोड़ी अर गंगणाणू रै-“राजभगति को ईनाम मिलदो ही मिलदो च, चाह कै बी रूप मा हो। ठीक बोल्यूं च अपडो मारो छैल फेंको, भैरो मारो भेल घाम ढोळो।”

ठाकुर महिपत तें अब गैरी नींद पोड़गे छै।



चण्डीगढ़ मा उत्तराखण्ड महोत्सव

• दीनदयाल सुन्दरियाल

चण्डीगढ़ स्थित कलाग्राम का खुला मंच व परदरसनी मैदान म तीन दिनी कौथिग उत्तराखंड महोत्सव-2017 को आयोजन फरबरी 10 से 12 तक बड़ा धूम धाम से हवे जख उत्तराखंड का परंपरागत लोक गीत, नृत्य, ढोल दमो वादन, हस्त शिल्प, साहित्य व पहाड़ी रसोई व्यंजन आदि को उत्तराखंडी समुदाय का लोगु न भरपूर आनंद उठाइ।

देहरादून की स्वयंसेवी संस्था “अभ्युदय” द्वारा नाबार्ड, उत्तर क्षेत्र सांस्कृतिक केंद्र, पटियाला, उत्तराखंड उद्योग निदेशालय, जीवन बीमा निगम आदि का आर्थिक सहयोग व स्थानीय उत्तराखंडी संस्थाओ की मदद से चण्डीगढ़म पैलि बार इतना बड़ा कार्यक्रम को आयोजन हवे जो परवासी समाजम खूब पसंद करेगे।

पैला दिन मा पार्षद श्रीमति हीरा नेगीजी का हथु दीप प्रज्ज्वलत करी उत्सव की शुरुवात हवे अर जागृति मंच पंचकुला की महिला सदस्योन पारंपरिक वेश बूशा मा बद्दी - केदार वंदना करि। साँझ वेला म पद्मश्री श्रीमति वसंती बिष्ट द्वारा नन्दा जागर की प्रस्तुति हवे त अनीता रावत की प्रस्तुति कृष्णा तेरी बांसुरी भी खूब पसंद करेगे।

महोत्सव का हैका दिन अनिल बिष्ट व त्रिभुवन उनियाल की अगुवाई म पौड़ी बिटि अयां गढ़ कला सांस्कृतिक संस्था का कलाकारुन गोपीचन्द गायन समूह नृत्य प्रस्तुत करि खूब धूम मचाई त गजेंद्र राणा न चटपटा गीत सुणाकि दर्शकू तैई खूब नचाइ। आयोजन का आखिरी दिन भारी भीड़ का सामणी अल्मोड़ा की संस्था आदर्श कला केंद्र द्वारा मंचित रामी बौराणी गीत नाटिका व कुमाउनी झोड़ा, छपेली आदि लोक नृत्य से दर्शको को भरपूर मनोरंजन हवे जौंको साथ स्थानीय गायक आनंद सिंह कोरंगा व दगिड्या कलाकारु भी दे।

हिमालय न्यूज से जुड्या भगवान चंद, सुमन गौड़ व धर्मानंद पुसोला द्वारा हास्य व्यंग की फुलझड़ी तीन दिनु तक दर्शकू थई गुदगुदाणी रैनी त अनन्या भट्ट, ज्योति बडोला, दिव्या भट्ट, अनुपम पुरोहित का मधुर गीत भी रोज लोगु तै सुणेणा रैनी। रुद्रप्रयाग बिटि अखिलेस दास व साथी कलाकारु न ढोल दमौ म जीतू बगडवाल ,व पांडव वार्ता प्रस्तुत करी खूब मनोरंजन करि।

तीन दिन क ये मेळा म आण वळा कौथिगेरुन झुंगरु, फाणू, चैंसु, भूडा, पकोड़ा, पहाड़ी कढ़ी (इवळि), आदि व्यंजनो को मजा लहे त साथ साथ पहाड़ी दाल, व हस्त शिल्प वस्तुओ की खरीददारी करी। धाद प्रकाशन का स्टाल म गढ़वाली साहित्य भी उपलब्ध छै।

मंच संचालन चंद्रपाल गुसाई, राम प्रसाद सुंडली, प्रकाश चंद बलूनी व बी डी बेलवाल न करी त फोटो व विडियो चित्रण रमेश चंद की टीम न सम्हाळी। महोत्सव की परिकल्पना निधि डंगवाल की छई त रजनी खाती, राजेंद्र नौडियाल, प्रदीप नवनी, कुन्दन लाल उनियाल, प्रदीप सुंदरियाल, धरमपाल रावत, सुदेश बाशिष्ठ आदि की मेहनत से या कल्पना साकार हवे साकि। मुंबई बिटि श्री केसर सिंह बिष्ट, दिल्ली बिटि सुरेन्द्र हालसी व स्थानीय संस्थाओं से कई वरषु बिटि जुड्यां जाण्या माण्या उत्तराखंडी श्री भवानी दत्त बाशिष्ठ, मेजर ओंकार सिंह नेगी, श्री नारायण दत्त लखेड़ा, सर्वश्री महानन्द शुक्ला, दीन दयाल सुंदरियाल, हरीश बड़थवाल, भगवती प्रसाद गौड़, बचन सिंह नगरकोटी, भगवती प्रसाद कुकसाल, बुद्धि चंद डोटियाल, भारत सिंह नेगी, जगदीश असवाल, बीरेन्द्र कंडारी, आदि की उपस्थिति ये कौथिग म बराबर रई। ये आयोजन की खास बात य छै कि लोगुन बिना पूर्व तयारी का भौत कम समय मा यो कौथिग उर्यायि जो इंतजाम अर प्रस्तुति कि कुछ कमजोरयू का बावजूद लोगु का दिल दिमाग परै छाप छोड़िग्या।

□□

रोजगार से जोड़े जाण चयेन्दि भाषा अर संस्कृति

• वीरेन्द्र पंवार

सुख्यमंत्री हरीश रावतन बोलि कि भाषा अर संस्कृति थैं रोजगार से जोड़े जाण चयेन्दि। याँका वास्ता समाज थैं ऐथर औण पड़लो। वूँन बोलि कि जतगा भि

हमारी बोली भाषा अर लोककला छन, यूँथें प्रोत्साहित कन्ना वास्ता सरकारी का अलावा समाज का स्तर पर भी कोशिश होण चयेन्दिन। अगर हम इन करदा त हमारा ये कदम से

हजारों लोग तै रोजगार मिल सकदो। जनकि अगर हम अपणां पहनावा तै,अपणि खान-पान,अपणां गैणां। वूँन बोलि कि औण वळि सरकार से साल मा एक दिन लोकभाषा का दगड़ा हि पहनावा अर वाद्य यंत्रु का वास्ता घोषित कन्नौ अनुमोदन करला। मुख्यमंत्रीन लोभाषाओं का पक्ष मा हस्ताक्षर अभियान कि शर्वात करि।

रावतज्जन वोळि हमारी बोलि भाषा इथगा मिट्ठी मयाळि छन,तौ बी यूँको विस्तार नि हवे सकणूँ च। अपणां भाषण मा वूँन मैसूस करि कि हम यूँ भाषाँ को फैलास नि करि सक्याँ हां कि लोकसंस्कृति का संग्रहालय बणाणें दिशा मा काम चन्नुं छ। वूँन जनसामान्य से अपील करि कि उ राज्य मा राज्य कि भाषाओं का अलावा पहनावा अर खान पान थें भि अगनैँ बढां। वूँन ये मामला मा ऐंपण को उधारण दे। वूँन बोलि कि वूँन ऐंपण कि शर्वात करि छै अर आज ऐंपण से तकरीब 25 हजार लोग कु रोजगार जुड्यूँ छ।इनि वूँन महिलों से खास करिक बोलि कि महिला अपणां कम से कम अद्दा जेवर पहाड़ी शैलि का बणांउन त याँसे तकरीब 25 हजार हौर लोग रोजगार से जुड़ सकदन। वूँन बोलि कि हमतैँ अपणां प्रदेश कि संस्कृति से प्यार कन्न चयेन्द। लोकभाषाओं थें पाठ्यक्रमों मा शामिल करे जाणूँ छ। याँका अलावा यूपीएससी कि परीक्षाँ मा अब 30 प्रतिशत सवाल उत्तराखण्डका इतिहास अर अन्य विषयों से ल्हिए जाला। याँका वास्ता वूँकि आयोग का चेररमैन से भि बात हवेगि।

धाद संस्थन कार्यक्रम का माध्यम से देश का प्रधानमन्त्रि नरेन्द्र मोदी का नौँ एक ज्ञापन भेजि, ज्याँमा वूँसे माँग करीँ च कि-जैँ तरौँ से वूँन चुनाव प्रचार का दौरान गढ़वाळि भाषा मा अपणि बात बोलि, गढ़वाळि भाषा थें सम्मान अर मान देणा का क्रम मा उत्तराखण्ड कि लोकभाषाओं थें आठवीँ अनुसूचि मा शामिल कन्नैँ पहल करुन। दुसरि माँग राष्ट्रीय लोकभाषा अकादमी कि स्थापना करे जाउ, ज्याँमा देश कि सब्बि लोकभाषाँ का अध्ययन अर शोध कि बिबस्था हो देश कि सब्बि संकट ग्रस्त भाषाओं संरक्षण अर विकास का वास्ता एक दिन लोकभाषा दिवस घोषित करे जाउ। राज्योँ का माध्यमिक से उच्च शिक्षा का पाठ्यक्रम मा 30 प्रतिशत स्थानीय इतिहास, संस्कृति, साहित्य अर प्रदर्शन कलाओं से सम्बन्धित विषय यू जी सी का निर्देशों का हिसाब से शामिल करे जाउन।राज्योँ कि लोकसेवा परीक्षाओं मा कम से कम 30 प्रतिशत सवाल राज्य कि संस्कृति, इतिहास अर भाषाओं से सम्बन्धित हों।

ये मौका पर ग्राफिक ऐरा विश्वविद्यालय का कुलपति डॉ० संजय जसोला जीन बोलि कि कैँ बि चीजौ विकास इन होण चयेन्द कि वु लम्बा समय तक जिन्दा रौ। जैकु तैँ बोलदन सस्टेनेबल डेवलपमेण्ट। वूँन बोलि कि आप लोग गढ़वाळि भाषा को सिलैबस बणांवा, मि यूजीसी अर मानव

संसाधन विकास विभाग का जरिया से यूनिवर्सिटी मा शुरू करै देलु। कुमाउंनी पत्रिका पहरु का सम्पादक हयातसिंह रावत जीन बोलि कि हमतैँ हमारा कपड़ों अर रैन-सैन से क्वी नि बतै सकदो कि हम गढ़वाळि या कुमाँउनी छौँ।क्वी बि हमतैँ हमारी बोलि भाषा से हि पच्छ्याणदू। हमतैँ अपणि भाषा अपणां घौर से बोनु शुरू कन्न पड़लि।जब तक हमारी नई पीढ़ि हमारा शब्दु से परिचित नि होलि तब तक हमारी संस्कृति तैँ नि बींग सकदि।

भारत का महासर्वेक्षक, डॉ0 स्वर्ण सुब्बारावन बोलि कि निन्द मा बि हमारी आत्मा अपणि दुदबोलि मा सोचदि। एक उधारण से वूँन बताए कि कैँ पर सियां मा चुंगनी दया, त उ अपणि मातृभाषा मा रिएक्ट कर्दु। वूँन बोलि कि मातृभाषा जिन्दा रैलि त हमारी संस्कृति जिन्दा रैलि।

वीरेन्द्र पंवारन बोलि कि मातृभाषा हमतैँ हमारी संस्कृति से जोड़दि। मातृभाषा थें रोजगार से जोड़े जाणूँ जरूरी च।वूँन बोलि कि पैलि हमारा अगवाड़ी आर्थिक चुनौती रैन,पर आज हमारा समाज मा होण खाण वळा लोग मौजूद छन, इलै अब भाषा का वास्ता निरन्तर काम करे जाणैँ जर्वत छ।

ये मौका पर धाद लोकभाषा एकांश का महासचिव शान्तिप्रकाश 'जिज्ञासू' का सम्पादन मा 112 लिखवारु का जीवन परिचय से सजी पुस्तक 'उत्तराखण्ड लोकभाषाओं के सृजनरत रचनाकार' नौँ कि पोथि कि मुखदिखैँ मुख्यमंत्री हरीश रावत का हातु से करेगे। ये मौका पर डॉ0 शेरसिंह पांगती, डॉ० अचलानन्द जखमोला, माधुरी बड़धवाल, रवीन्द्र नेगी, कमला पन्त आदि लोग मौजूद छया।

संस्थन तय करि कि संस्था 21 फरवरी से उत्तराखण्ड कि लोकभाषाओं का पक्ष मा जागरूकता अभियान चलाली।ये अभियान का जरिया 50 हजार लोगु का दसकत कट्टा करे जाला। इ दसकत बाद मा प्रधानमंत्री जी तक पौँछैँकि वूँसे उत्तराखण्ड कि भाषाओं थें आठवीँ अनुसूची मा शामिल कन्नैँ माँग करे जाली।

लोकेश नवानिन बोलि कि यूनेस्कोन जौँ 130 भाषाँ तैँ खतरा कि लिस्ट मा शामिल कर्युँ च, वूँमा गढ़वालि कुमाँउनी भाषा भी शामिल छन। संस्था ये भाषा आन्दोलन थें जनता से जोड़ने कोशिश कन्नी छ। धाद का सचिव तन्मय ममगाई न बोलि कि जैँ तरौँ से चुनाव का दौरान प्रधानमंत्री नरेन्द्र मोदी जीन गढ़वाळि मा भाषण देकि भाषा का निब्त जनता कि आस जगैँ,वे हिसाब से भि केन्द्र सरकार थें उत्तराखण्ड कि लोकभाषाओं थें आठवीँ अनुसूची मा शामिल कन्नैँ पहल कन्न चयेन्द।

ये कार्यक्रम मा लोकभाषाओं के साहित्य में नई कविता का उभार विषय पर ई रिपार्ट का लिखवार वीरेन्द्र पंवार को वक्तव्य रखेगे छौँ,पर मुख्यमंत्री औणां अर जाणां टैम पर मंच पर चलदा वक्तव्य तैँ बीच मा द्वी दौँ रोकेगे। वीरेन्द्र पंवारन गढ़वालि

कविता पर फोकस्ड अपणां आलेख मा बोलि कि खुद अर खौरि का बखान से शुरु होई गढ़वालि कविता आज दुन्या का साहित्य कि तरौ ऐथर बढण चार्णी छ। गढ़वाळि कविता अब अफुतैं बिंगणैं अर समजणैं कोशिश कन्नी च अर समैं का हिसाब से ई बात मा कुछ गलत भि नी छ। वूँन बोलि कि गढ़वाळि कविता मा नई कविता का दर्शन कन्हैयालाल डंडरियाल जी कि कवितों से शुरु होन्दन। तबारी गढ़वालि कवि का सामणि एक तर्प त अफुतैं स्थापित कनै लडै लडन पडनी छै, त दुसरि तर्प कविता का सामणि या बडि चुनौति छै कि वा दुन्या कि कवितों का सामणि टकटक हवे सकु। गढ़वाळि कि समकालीन नइ पीढ़ि मा भाषा अर कविता कि तर्प सोर दिलौण वला युगपुरुष लोकेश नवानी बतौन्दन कि सन् 1975-76 का नजीकौ समै रै होलु, तबारी कन्हैयालाल डंडरियाल जी कि या कविता कवि सम्मेलनु का मंच पर सुणैण बैठगे छै।

**धरती को मुकट, भारत को भाल हमारू गढ़वाल।
यखै संस्कृति-गिन्दडु, भुज्यलु, ग्यगुडु, गडयाळ।**

कविन गढ़वाळ मा ब्याप्त कुरीतियों, जीर्ण-शीर्ण मान्यताओं, तंत्रा-मंत्रा आदि पर ब्यंग कन्नी। लोक प्रतीकों वळि वूँकी अभिव्यक्ति की शैली प्रभावित कर्दि। इख बटिन डंडरियाळ जीन कविता का पारम्परिक मिजाज मा बदलाव का संकेत देनि। कन्हैयालाल डंडरियाल का बाद गढ़वाळी कविता मा इ परिवर्तन एकदम तेज हवेगेनि। सन् 1977-80 का दौरान स्पष्ट रूप से कवितों मा दिखेण बैठनि। आठवां दशक का येई दौर थैं जख बटी गढ़वाली कविता मा नयो उभार या नया परिवर्तन दिखेन्दन।

गढ़वाळि समग्र साहित्य का समीक्षक भीष्म कुकरेती वर्तमान दौर थैं गढ़वाळि कविता को स्वर्णकाल माणदा। डंडरियाल जी का बाद कविता का नया उभार नेत्रासिंह असवाळ जी का जरिया अगनै बढि। ई परम्परा थैं चिन्मय शायर, सुरेन्द्र पाल

समेत नया लिखवारुन अगनै बढै। देवेन्द्र जोशिन सियां लोग का जरिया न केवल समाज का लोगु तैं बलकन पारम्परिक कविता लिखदरा कव्यूँ अर कविता थैं बिजाल्लै बि कोशिश करि। सन् 1992 का दौर मा गणेश खुगशाळ 'गणि' गढ़वाळि कविता मा जापानी शैलि कि हाइकू कविता भी ल्हेकि ऐनि। औरि कव्यूँन भि हाइकू पर हात अजमैनि पर झणि किलै हाइकू कविता गढ़वाळि मा जादा लोकप्रिय नि हवे सकि। मधुसूदन थपलियाल कि अगल्यार मा गढ़वाळि कविता को एक उभार गजल कि तर्पा भि बढदु दिखे। गजल गढ़वाळि लिखवारु तैं रास भी और्णी छन, गजल कि तकनीकि जानकारी कम होणां कारण भौत प्रगति होई नि दिखेन्दि। वर्तमान दौर मा एक बार फेर गढ़वाळी कविता थैं नयो उभार मिन्नूँ छ, मधुसूदन थपलियाल का कविता संग्रह 'बाघ का बोण' (सन् 2014) से। ये संग्रह कि कविता गढ़वाळि मा एक हौर क्रान्तिकारी परिवर्तन की दस्तक देन्द नजर और्णी छन। यो संकलन गढ़वाळि मा अभिव्यंजना काव्य की बेहतरनीन बानगी छ।

मातृभाषा दिवस कार्यक्रम पर उरायां ये कार्यक्रम कि मन्सा भौत अच्छि छै, कार्यक्रम हवे भी बढिया च, पर कार्यक्रम का घपरोळ का बीच यु महत्वपूर्ण आयोजन खतम होन्द होन्द ब्यखुनिदाँ निपटौणयाँ स्टाइल मा पुयायेगे। असल मा संस्था या इना कार्यक्रम कर्दरि संस्थौँ थैं ध्यान देण जरूरी च कि कवी भि कार्यक्रम फोकस्ड होण चयेन्द। या त कार्यक्रम हो या नि हो। ये भाषा दिवस का भित्र इतगा कार्यक्रम शामिल छ- मातृभाषा दिवस कार्यक्रम, किताबै मुखदिखै, मुख्यमंत्रि कि मौजूदगी, लोकभाषाओं का पक्ष मा हस्ताक्षर अभियान, नई कविता का उभार पर व्याख्यान अर कवि सम्मेलन। अब लगा कि इतगा कार्यक्रम खताखति एक साथ कनकवे हवे सकदन। खैर अजकाल कार्यक्रम उर्योण ही अपणां आप मा बडि बात च। ये हिसाबन कार्यक्रम सुफल रै।



कथा ग्रन्थ "हुंगरा" को लोकार्पण

• गिरीश सुन्दरियाल

गढ़वाळी कथा ग्रन्थ "हुंगरा" को दिनांक 25 फरवरी 2017 खुणि टाउनहाल देहरादून मा लोकर्पण हवे "हुंगरा" गढ़वाळ कथा साहित्य को एक महत्वपूर्ण अर प्रतिनिधि दस्तावेज छ जैमा कथा जगत की भूत वर्तमान अर भविष्य का दर्शन होंदन "हुंगरा" यीं बातों की पुख्ता प्रमाण छ कि गढ़वाळि मा कहानी विधा कतगा पुराणी अर सशक्त छ, हुंगरा विश्व का कथा साहित्य मा एक अनूठी अर अपणि तरौ को अलग संकलन छ।

"हुंगरा" मा सौ सालै सौ श्रेष्ठ कथा संकलित छन जो कि शायद इनु प्रयोग हौरि भाषौ मा नि हवे, गढ़वाळी की कथा जात्रा सौ सालु मा कन रै यीं मा क्या बदलौ ऐनी, अपणा सम्पूर्ण समाज की अन्दार या मा दिखेंद। 'हुंगरा की शुर्वात 1913 मां सदानन्द कुकरेती की कथा "गढ़वाळि टाट" से होंद अर 2013 तक की कहानी तक पौँछद, यानै य सौ-सालै कथा जात्रा को एतिहासिक दस्तावेज वि छ। भाषाविदों को मानणु छ बल साहित्य भाषा को पुख्ता अर एतिहासिक प्रमाण छ अर गढ़वाळ मा यांकी कवी कमी नी।

अब कवी इन नि बोलि सकदु कि गढ़वाळ कथा की गंगा बिसगणी छ, जै समाज को साहित्य जतगा समृद्ध होलु वा भाषा उतगै समृद्ध होली, यीं बातै गवै इतिहास बि देँदु।

हुंगरा का लोकर्पण का मौका पर कार्यक्रम मा अनेक साहित्यकार, रंगकर्मी अर बुद्धिजीवी मौजूद छया, कार्यक्रम की अध्यक्षता लोकगायक श्री नरेन्द्र सिंह नेगी जीन करे, मुख्य अतिथि बलूनी क्लासेस का महा निदेशक श्री विपिन बलूनी जी का प्रतिनिधि का रूप मा शिक्षाविद एस.एव. राणा जी अर विशिष्ट अतिथि समाजसेवी श्री कवीन्द्र इष्टवाल जी छया, कार्यक्रम का ये सत्र मा मुख्य वक्ता वरिष्ठ कथाकार मोहनलाल नेगी, 'हुंगरा' संकलन पर महत्वपूर्ण समीक्षा देण वळि साहित्यकार श्रीमती बीन बेंजवाल समयसाक्ष्य की प्रकाशक श्रीमती रानू बिष्ट ग्रन्थ का सम्पादक द्वय श्री मदन मोहन डुकलाण व गिरीश सुन्दरियाल अर कार्यक्रम संचालक गणेश खुगशाल 'गणी' मंच पर मौजूद छया, अपणा सम्बोधन मो श्री एस.एस. राणा जीन बोले कि बलूनी क्लासेस अर सोशल बलूनी पब्लिक स्कूल भी अपणा स्तर पर अपणि मातृभाषा अर संस्कृति का वास्ता काम कना छन, समाज मा यांका वास्ता जो भी प्रयास कारलो हम वेकी मौ-मदद कनौ हमेशा तत्पर छं। कार्यक्रम का मुख्य अतिथि कवीन्द्र इष्टवाल जीन बोले कि हमारा समाज मा भौत सारा लोग अपणी भाषा अर संस्कृति का वास्ता महत्वपूर्ण कार्य कना छन, बिना कै सरकारी मदद अर कठिन आर्थिक परेशानी का बावजूद भी साहित्य को प्रकाशन अर वे तै पाठकों तै पौछणू भौत चुनौतीपूर्ण काम छ, फिर भी बावजूद ये का जु लौग इन काम कना छन वो वधै का पात्र छन, मुख्य वक्ता कथाकार मोहन लाल नेगी जीन भी गढ़वाळि कथा का इतिहास अर वर्तमान पर व्याख्यान दे। वून बोले कि हमारा वे जमाना से आज भौत अच्छु काम साहित्य मा होणूछ गढ़वाळि कथा को भविष्य भौत उज्जवल छ। मित हमेशा अध्या कृणा-कुमच्यरौ मा हि कथा ल्यखणू रौ, पली बार कै मंच पर अपणी बात रखणू छै। ये मौका पर वूं तै पैला 'चिट्ठी-सम्मान' - 2017 से विभूषित करेंगे, वूं तै अंगवस्त्रम, स्मृति चिहन, मान पत्र एवं 5001 रूप्या की धनराशि से सम्मानित करेगे। यो सम्मान समारोह पैली बार आयोजित करेगे अर चिट्ठी सम्मान पाण वळा वो पैला साहित्यकार बणिनि।

सम्पादक मदन मोहन डुकलाण जीन ग्रन्थ की शूर्यात बटी प्रकाशन कि चुनौती अर सघर्ष को जीक्र करे वून तमाम साहित्यकारों, समाज सेव्युं अर पाठकों को धन्यवाद व्यक्त करै जौंका सहयोग का बिना हुंगरा कि हम सोच बि नी सकदा छया। हुंगरा का प्रकाशन मा हमतै पट्ट पाँच-छै साल लागि गेनि आखिर सौ कहानी इकबटोळ कनी अर वे को सम्पादन अर प्रकाशन कवी सौंगू काम त नी छ।

हुंगरा की समीक्षा जै ढंग से अर जै विस्तार से साहित्यकार बीना बेंजवालन करें, वां तै सिर्फ वी हि करि सकदि छै, वीन लगभग सब्बि कहान्युं को सार, कथानक, संवाद उद्देश्य सहित पात्रु को चरित्र चित्रण भी बड़ी कुशलता से करें, जोकि रोचक होण का साथ-साथ गम्भीर अध्ययन व धैर्य को प्रतिफल छयो, म्यारा द्यखण मा कै समीक्षकन पैली बार 100 कथौं पर इतगा विस्तार से बोले अर वो भी कथौं का भितरखण्ड तक पौछिकै, वींका अध्ययन अर धैर्य की जतगा भी प्रशन्सा करे जाव कमहि कम छ। अपणा अध्यक्षीय भाषण मा लोक गायक श्री नरेन्द्र सिंह नेगी जीन बोले कि हमारा समाज तै अपणी भाषा अर संस्कृति का वास्ता भी उतगै चितळु होण प्वाडलो जतगा वो अपणि सुख सुविधौ का वास्ता होंदन, हम सड़क विजलि पाणी आदि का वास्ता त बड़ा-बड़ा आन्दोलन करि देंदा सरकार पर दवाव बणा दिंदा पर भाषा-संस्कृति का सवाल पर बौग सारि दिंदा। अगर हमारी भाषा संस्कृति ही नि रैली जांसे हमारी पछ्याण छ त क्य कन हमन वूं सुख सुविधौ को। यान हमतै एकजुट-एकमुठ हवेकि सदिन अपणि बोळि-भाषा अर संस्कृति की आवाज उठाण चेंद, कार्यक्रम का पैला सत्र को समापन वूंका सम्बोधन से हवे, कार्यक्रम का दुसरा सत्र मा गढ़वळी कवि सम्मेलन वीरयेगे। जैमा श्री नरेन्द्र सिंह नेगी जी का साथ ही देवेन्द्र जोशी, पयाश पोखड़ा, हरीश जुयाल 'कुटज', धर्मेन्द्र नेगी, ओमप्रकाश सेमवाल, हेवतीनन्दन भट्ट, उपासना पुरोहित, ओम वधाणी, सुनील थपलियाल घंजीर, गणेश खुगशाल 'गणी', मदन मोहन डुकलाण अर गिरिश सुन्दरियाल न कविता पाठ करे।

हुंगरा का प्रकाशन का साथ ही गढ़वाळ गद्य खास करि कहानी विधा पूरी तस्वीर समिणि ऐ जांद, गढ़वाळी गद्य का इतिहास मा कथा संग्रह को प्रयास 1946 मा प्रो0 भगवती प्रसाद पांथरी जी द्वारा 'पांच फूल' उल्लेखनीय छ, जैमा वूकी पांच कहानी संकलित छ, पर अलग-अलग कथाकारों की कहानी एक ही संकलन मा हो त यो प्रयास शकुन्त जोशी का सम्पादन मा 'रैबार' पत्रिका मा हवे, जैमा वूका अलावा भगवती चरण निर्मोही, डॉ शिवानन्द नौटियाल, दयाधर बमराड़ा, नित्यानन्द मैठाणी, राजेन्द्र धस्माणा जना ल्यखवारू की कहानी संकलित छन। ये का बाद कृछ कहानी 1976 का अवोध बन्धु बहुगुणा जी द्वारा सम्पादित "गाड़ म्यटेकी गंगा" मा भी प्रकाशित हवनी। गढ़वाळि कथा साहित्य मा जनु महत्वपूर्ण काम भगवती प्रसाद जोशी, दुर्गा प्रसाद घिल्डियाल अवोध बन्धु बहुगुणा प्रतात शिखर आदि को रये उन्नि मोहनलाल नेगी को बि छ, ये बग्त वो गढ़वाळि कथाकारों मा सबसे वरिष्ठ कथाकार छन जो हमारा बीच छन। यान ये मौका पर वूं को सम्मान हमारा

समाज अर साहित्य को सम्मान छ। जीवन का सत्तासी वसन्त देख चुक्या श्री मोहन लाल नेगी का द्वी कथा संग्रै जोनि पर छापु किलै (1967), बुरांश की पीड़ (1987) अर उपन्यास 'सुनैना' (2012) मा अर 10 गढ़वाळि कथों को अंग्रेजी अनुवाद प्रकाशित छ।

'हुंगरा' का प्रकाशन से हमारो कथा साहित्य हौर सूमद्ध हौलू अब हम थै गढ़वाळि कथा कि छ्वी लगाण मा न मुण्ड कन्जाण पोड़लो न जल्का लगाण प्वाड़ली, बल्किन यूं कथौ तै पढ़न-सुणन मा हुंगरा दीण मा वा 'रात' बि खुळि जाळि जैकी बिन्सरि की जगवाळ मा हम सब छं इनि हमारी आशा छ।

□□

राजनेता भारतसिंह रावत को निधन

• विमल ध्यानी

भा रतीय जनता पार्टी का वरिष्ठ नेता अर उत्तराखण्ड योजना आयोग का पूर्व अध्यक्ष भारत सिंह रावत जी को 26 फरवरी 2017 को 86 साल की उमर मा निधन हवेगे बून अपणा कोटद्वार का घर मा आखिरी सांस लहे।

भारत सिंह रावत जी को जन्म 25 जनवरी 1930 खुणि पौड़ी जिला का रिखणीखाल बिलोक की विचला बदलपुर पट्टी का चपड़ेत गौमा अपणां टैमा जण्या मण्या थोकदार गुमान सिंह रावत जी का घौर मा हवे भारतसिंह जी की माँजी को नौ छवाणी देवी छै।

रावत जी की प्रारम्भिक शिक्षा प्राथमिक विद्यालय बुंगलगढ़ि मा हवे वून आठवीं तक किंगजार्ज हायर सेकेंडरी स्कूल लैसडौन (रा०इ०का० जयहरीखाल) मा पढ़ि, हाईस्कूल डी.ए.वी. दुगड्डा, इण्टर डी.ए.

बी. देहरादून अर स्नातक की शिक्षा बि डी.ए.बी. देहरादून विटि लहे डिग्री कालेज अल्मोड़ा विटि वून बी.टी. की परीक्षा पास की अर 1957 मा हाईस्कूल भृगुखाल का अध्यापन शुरू करि यलि छै, 1962 मा रेजीमेंटल स्कूल लैसडौन मा विज्ञान अध्यापक का वास्ता चुने गेनि अर तैई साल विटि रावत जी नौकरी छोड़ी सक्रिय राजनीति मा ऐनि। वर्ष 1962 मा भारतसिंह रावत जि रिखणीखाल ब्लाक का ब्लाक प्रमुख बणिनि 1974 मा पैलिवार कांग्रेस का टिकट पर चुनौ लड़िकि लैसडौन विधान सभा का विधायक बणिनि, आपतकाल का बाद 1977 का लैसडौन क्षेत्र विटि फिर बिधैक चुने गेनि, 1988 मा पौड़ी जिला पंचायत का

अध्यक्ष बणिनि अर अध्यक्ष पद विटि त्यागपत्र दे कि 1988 मा लैसडौन का विधायक चुने गेनि, रावत जी कि लोकप्रियता को अंदाजा यां से बि लगये सकेंद कि 1991 की रामलहर मा बि वो लैसडौन क्षेत्र बिटि कांग्रेस का टिकट पर विधायक

बणिनि, वर्ष 1996 मा रावत जिन भारतीय जनता पार्टी की सदस्यता लहे अर वेई साल लैसडौन क्षेत्र बिटि भाजपा का विधायक चुने गेनि, वर्ष 2000 मा उत्तराखण्ड राज्य वणण पर रावत जी उत्तराखण्ड योजना आयोग का उपाध्यक्ष बणये गेनि, उत्तराखण्ड राज्य आंदोलन मा बि भारत सिंह रावत जी को बड़ो योगदान छै।

उत्तराखण्ड की राजनीति मा ही न बलकन अखण्ड उत्तर प्रदेश की राजनीति मा भारत सिंह रावत हिमालय पुत्र हेमवती नन्दन बहुगुणा का सबसे विश्वस्त लोगु मा एक छ। रावत जी का भोलापन अर सरल स्वभौ

की वजह से बहुगुणा जी तौ की नौ 'भोला' ही रिख यलि छै और सदान भोला बोलि कि ही बुलोदा छ। उत्तराखण्ड का समग्र विकास की मनसा रखण वळा भारत सिंह रावत जी ये विकास का वास्ता 'श्री टी' की बात करदा छ यामा पैली टी को मतलब छै टिम्बर यानी लकड़ी मतलब बौण या से वो पर्यावरण बि जोड़दा छ दुसरी टी माने चाय की खेती अर तिसरी टी छै टूरिज्म यानि पर्यटन अर उत्तराखण्ड का समग्र विकास थै वो यों तीन टी मा दिखदा छ अर वूं को यो मंत्र आज भी उत्तराखण्ड का विकास का वास्ता महत्वपूर्ण छ जरूरत छ ये पर काम करणा कि।

□□